

東
華
續
錄

東華續錄

咸豐九十七

臣王先謙敬編

臣陶澐宣恭校

冬十月辛酉朔諭內閣本年天氣漸居嚴寒朕擬暫緩回鑾俟明
歲再降諭旨○曾國藩奏據副將林保等稟稱自甯國城中糧米
罄盡已無生理將弁各官均請周天受出城徐圖再振周天受誓
以身殉不肯出城黃昏時羣賊燔入旋即遇害署皖南道福咸當
城破時出戰於南門街上身受二傷與甯國府知府顏培文宣城
縣知縣王乃晉同時殉難臣查已革湖南提督周天受堅守七十
餘日援盡糧絕軍民愛戴城破身殉大節凜然其胞弟周天培去
年在江北殉節胞弟周天孚本年在金壇殉節亦係堅守孤城力
竭不屈一門忠義貞烈可風周天受應請開復原官照提督例從

優賜卹並請於甯國府建立專祠仍於四川省城及本縣建立周天受周天培周天孚三人祠宇以褒忠義而昭激勸江甯巡道福咸所署皖南道缺業已另放有人猶能固守危城效死弗去應請與甯國府知府顏培文宣城縣知縣王乃晉暨竹塘殉節之署永州營遊擊副將朱景山均照本職從優議卹附祀周天受甯國祠內以慰忠魂至徽州之陷皖南道李元度既不能穩修營壘又不能堅守待援貽誤大局責無可辭道銜徽州府知府劉兆璜歙縣知縣羅德隆徽州營參將文芳身任地方均有應得之咎應請旨將李元度革職拏問劉兆璜羅德隆文芳均行革職其打仗不力之候補參將鎮筓營遊擊楊鎮魁候補遊擊蕭以德守備鄒良佐都司姚才立均請革職都司銜孔旭日千總余大勝管帶親兵敗不歸伍輕棄主將請旨卽行正法以肅軍律至叢山關力戰陣亡

之同知童梅華守備張斐文均請交部從優議卹 上諭內閣已
革湖南提督周天受力守甯國危城七十餘日糧盡援絕誓以死
守於城陷時遇害署皖南道福咸巷戰受傷旋即殉難甯國府知
府顏培文宣城縣知縣王乃晉亦皆同時殉難均堪憫惻周天受
著開復原官照提督例從優賜卹並於甯國府建立專祠其胞弟
周天培上年在江北殉節周天孚本年在金壇殉節亦係堅守孤
城力竭不屈一門忠烈大節懔然著於四川省城及本縣建立周
天受周天培周天孚三人祠宇以褒忠義而昭激勸江甯巡道署
皖南道福咸甯國府知府顏培文宣城縣知縣王乃晉竹塘營殉
節之署永州營遊擊副將朱景山均各照本職從優議卹附祀周
天受甯國專祠以慰忠魂至徽州之陷皖南道李元度不能堅守
待援以致貽誤大局責無可辭徽州府知府劉兆璜等身任地方

均有應得之咎皖南道李元度著革職拏問徽州府知府劉兆璜
歙縣知縣羅德隆徽州營參將文芳均著革職其打仗不力之遊
擊楊鎮魁候補遊擊蕭以德守備周良佐都司姚才立均著革職
都司銜孔旭日千總余大勝敗不歸隊輕棄主將均著卽行正法
以肅軍律其叢山關力戰陣亡之同知童梅華守備張斐文均著
交部從優議卹○諭軍機大臣等本日據恭親王奕訢等合詞籲
請回鑾一摺此次恭親王等議撫換約奏請回鑾固係爲鎮定人
心起見然反復籌思木蘭巡幸係循 祖宗舊典其地距京師尙
不甚遠與在京無異足資控制朕意本年暫緩回鑾俟夷務大定
後再將回鑾一切事宜辦理所有各衙門引見人員及一切應辦
事件見均查照木蘭舊例遵行辦理至前派應行前赴行在者著
卽飭前來其各衙門辦事之堂司各官均著趕緊清理積壓諸事

勿少稽延將此由六百里諭令知之○諭前因直東一帶土匪蠭起當諭僧格林沁瑞麟帶兵前往剿辦並諭勝保將僧格林沁等撥交之吉林黑龍江馬隊一千數百名交瑞麟先行帶往河間剿辦土匪茲據勝保奏匪首王落越遣人投誠獻縣等處滋事匪眾係王啟山等六人爲首因伊不肯從到處冒名計圖嫁禍王落越情願齊集練勇擒獲王啟山等解散其黨以圖自贖王落越是否真心畏罪自明仍著僧格林沁等詳細查明卽令拏辦王啟山等贖罪以期迅速藏事本日據杜翻奏擒匪猖獗濟甯兗州泗水均已被圍文煜所帶兵勇尙未趕到僧格林沁等俟畿輔一律肅清卽行前赴山東節節剿辦以期盡絕根株至吉林黑龍江馬隊業經勝保奏明聽候僧格林沁調遣如兵力尙有不敷著僧格林沁等再向勝保大營分撥以利攻剿將此由六百里諭令知之○諭

前據勝保奏東省捻氛甚熾諭令文煜統帶兵勇卽赴濟甯會同德楞額等兵勇前往攻剿嗣復諭令勝保將該大臣軍營山東兵二千餘名遣回交文煜調遣其張得勝恆齡各軍二千數百名均已畱於東省助剿本日據杜翻奏曹州兗州沂州泰安濟甯等屬二十六州縣均有匪蹤出沒濟甯兗州泗水均各被圍連日尙無確耗各等語文煜旣已接奉前旨著卽會同德楞額等督率各路兵勇四面兜擊分投剿辦毋任蔓延季錫魯陣亡西路帶勇人少著卽派已革道員黃良楷協同趙康侯分帶團勇以資得力將此由六百里加緊諭令知之○諭慶廉奏粵逆圍撲壽州分調官兵扼要堵剿並擬暫駐彰德以杜北竄一摺粵逆數萬人糾合捻逆攻撲鳳陽業經官兵擊退壽州業已解圍惟捻逆大股竄入東境勢甚猖獗兗曹濟甯一帶均有匪蹤歸德地方與山東毗連亟宜

力圖扼截毋令擾及豫境見在夷氛已退業經諭令慶廉毋庸北上所有前派兵勇著慶廉卽帶赴歸德駐紮以便剿除逆匪毋使滋蔓另片密奏藩司賈臻恃才妄作膜視軍餉等語該司於應籌軍餉京餉遷延不解殊屬不知緩急著嚴飭該司於應籌兵勇口糧及欠解京餉迅卽如數報解儻敢仍前玩泄卽著嚴參懲治將此由六百里諭令知之○諭傳振邦奏捻趨東北經官軍擊剿截回並徐宿獲勝偪賊西趨一摺捻匪徑趨東北經傳振邦調派署總兵李恆清等於荊山橋台莊一路迎頭截剿大有斬擒其攻偪徐郡之賊復經吳棠等縋城追殺賊仍往西北伺隙濟甯一帶本日據杜翻奏報捻匪滋擾東省見在曹州沂州兗州泰安濟甯州所屬二十六州縣時有告急文報或城關被圍或屢戰失利賊蹤業已北趨勢甚猖獗亟須官兵迎頭截剿以期迅速堵遏傳振邦

前派恆齡等所帶之兵一千數百名業經勝保飭令留東助勦田
在田見在督同胡元昌等繞赴單縣卽著繞前杜截偏令回巢以
固北路藩籬是爲至要將此由六百里加緊諭令知之○壬戌諭
內閣崇實奏籌辦團練各情形並據李惺奏滙陳下情請另行簡
派督辦大員一摺據稱川省團練並無堪勝提督之巨紳不若責
成州縣各遵所屬紳士佐之由各該上司時加稽覈以收官紳一
氣之效其團練需費全藉民力密查從前辦理官紳有無勒追肥
己情弊據實嚴參懲辦一面將每月所收所用數目榜示通衢以
杜侵蝕所奏係爲通籌大局起見卽著照所議辦理前任右春坊
右贊善李惺年近八旬精力已衰不能勝任著卽撤去督辦四川
團練大臣並毋庸賞給五品卿銜所有四川省督辦團練事宜著
責成該省總督藩臬督飭各州縣及各屬紳士認真辦理○諭軍

機大臣等駱秉章奏帶兵入川請由川省接濟軍餉等語前命駱秉章赴川督辦軍務該撫已於九月十八日交卸撫篆料理啟程所帶劉嶽昭等軍不下萬人湖南僅能籌給行糧一入川境卽須接濟著崇實卽飭局員於夔州所屬擇要設立糧臺寬籌糧餉俾楚師士飽馬騰迅速奏功是爲至要將此由六百里諭令知之○諭據德楞額等奏追剿竄匪疊有斬擒一摺此次擒逆竄入東境在兗州擊退後擁眾東竄據德楞額奏稱已諭色爾固善帶領馬隊自宮里集地方鈔至大汶口北面截其北竄青泰之路並令富新帶兵駐紮曲阜搜捕土匪該副都統馳抵平邑與色爾固善合隊自北向南攻剿等語前因濟甯被圍諭令德楞額前往救援自係因剿捕東路竄匪未遑兼顧見在曹濟一帶均未肅清著俟兗沂竄匪偪回老巢後卽會同文煜所帶兵勇迅將各處匪徒一律

歸蕩勿令北犯一步將此由六百里諭令知之○李維翰以病免

以畢道遠爲兵部右侍郎

由內閣學士遷

○張亮基以病免以劉源灝爲

雲貴總督鄧爾恆爲貴州巡撫陳景亮爲雲南布政使貢璜爲山

東按察使

由長蘆鹽運使遷

○加賞駐紮張家口備錫林郭勒官兵柴炭

銀○予四川殉難典史徐恩源祭葬世職○駱秉章奏粵西之賊

由永明擾及道州江華時周達武王永章李金暘三營分駐蔣家

嶺等處堵截八月初八至十六等日該逆分股由龍虎關竄越周

達武等聯絡分布會同團練攔頭迎剿初八十一兩日邀擊於玉

田村斃賊數千賊目陳汝昇等棄械投誠約四千人資遣回籍者

三千餘眾挑留精壯四五百人責令效力自贖十五十六日邀擊

於古子江督率降卒直前衝擊而團練自後圍裹斃賊尤多由是

石逆所部左旗後旗賊黨無一脫者此次粵匪注意湖南爲竄擾

江西之計周達武等以少擊眾奮勇立功各屬鄉團隨同官軍掃
除悍賊在事員弁兵勇官紳團練均屬著有微勞可否由署撫臣

翟誥擇尤保獎以示鼓勵 上從之○癸亥諭內閣翰林院侍讀

學士綿宜奏職員呈請回籍勸捐據情代奏一摺山西職員張國

棟謝智爾請回籍勸捐欲由戶部發給執照見在山西勸諭捐輸

皆歸地方官督同紳士辦理若再添設市井之徒從中勸諭百弊

叢生不可勝言且由戶部發給執照前往勸捐亦無此政體綿宜

所奏不准行○諭清盛奏濟甯解團團勇接仗獲勝並見在撥兵

截剿情形一摺捻逆竄入東境圍攻濟甯州城經署知州盧朝安

督率同城文武紳團嬰城固守不時縋城迎擊互有殺傷復會合

河標參將孫延略遊擊周貞元兩路夾擊槍礮轟發賊始分股奔

竄該州城圍立解見在竄賊分股肆擾著文煜會同德楞額督飭

將弁迅掃逆氛無任延蔓○諭翁同書奏六安解圍一摺粵逆圍攻六安州城西捻數萬亦竄至固先寺丁家集一帶經總兵吉順等由水陸各路分股兜擊賊勢不支悉向東南遁去六安城圍立解在事尤爲出力之總兵吉順著賞還提督銜其餘員弁兵練著翁同書擇尤保奏○諭軍機大臣等見在軍機處事繁人少焦祐瀛著卽赴行在當差所有津南彈壓土匪事宜著交張之萬陳鴻翔辦理將此由五百里諭令知之○諭毛昶熙奏請專派藩司辦理撫局等語據稱捻首孫葵心蓄意投誠惟負罪深重辦撫之員非所深信往往遲疑中止該捻首聞藩司賈臻前隨勝保招撫李世忠始終孚以誠信深爲感服每欲由該司受撫等語孫葵心如果真心悔罪投誠其機自不可失著毛昶熙會同慶廉體察情形儘該逆首遣人具稟卽著責成該藩司悉心經理務須示以誠信

使之不疑而又不至墮其術中致貽後患是爲妥善將此由六百里諭令知之○以捻逆竄入山東署巡撫清盛下部議處○予山東陣亡知縣季錫魯等河南殉難知縣武世昌祭葬世職○甲子直隸總督恆福奏津郡新設埠口通商請飭文謙籌辦得旨飭令文謙赴津會同恆祺等辦理通商事宜吳廷棟著回省督辦防務○乙丑諭內閣僧格林沁等奏請畱道員辦理糧臺並前次報銷暫行緩辦等語見命該大臣等統兵剿匪所有軍營糧臺卽著派天津道孫治辦理至該道前次所辦糧臺業經報銷二次其第三次報銷自應隨時報部方免軼轍著卽飭令趕緊清釐以重帑項○諭朕聞京師城內夜間明火劫案層見疊出輦轂重地豈容匪徒肆行無忌著瑞常文祥慶英嚴飭巡捕旗營各員弁認真捕拏訊明後卽行正法如該員弁再行玩泄卽著嚴參懲辦並著順天

府五城一體嚴拏務須搜捕淨盡毋令宵小潛蹤以儆匪類而安
善良○諭軍機大臣等本日據御史蔣超伯奏本年秋初江北高
郵界馬棚灣決口潰溢至三四百丈之寬直注下河各邑秋禾不
及收割通泰鹽場亦皆淹浸等語裏下河十二州縣爲漕米鹽課
關稅所從出若不堵築決口致該地方久被淹浸恐江北軍餉無
從取給關繫非輕著王夢齡會同晏端書迅籌修築或卽勸諭紳
耆民捐民辦以工代賑趁此冬令水淺之時迅速興工俾財賦之
區災黎不至失所毋得假手吏胥致滋弊竇將此由五百里諭令
知之○命直隸布政使文謙籌餉二十萬兩解往欽差大臣僧格
林沁軍營○京口副都統巴棟阿因病賞假命甘肅西甯鎮總兵
官馮子材督辦鎮江軍務○丙寅諭軍機大臣等恭親王奕訢等
奏俄約已換一摺此次恭親王等於本月初二日業將俄約畫押

蓋印與之互換惟地圖一分係綏芬烏蘇里河分界之據因前定條約曾添入空曠之地遇有中國人住並漁獵之處俄人均不得占之語一經畫押漫無限制告以明春須派員互勘未卽畫押自係爲慎重界址起見此次俄約十五款除吉林黑龍江二處已令軍機大臣鈔寄行知外其餘各省尙有應行行文知照之處著恭親王等一體知照以便屆時會同酌辦○諭昨因僧格林沁等請調官兵當諭俟馬步各隊調齊卽馳赴河間剿辦茲據恆福奏省南一帶土匪蠢起安平縣有土匪三四百人由深州闖入該縣黃城村內焚搶東鹿縣有土匪千餘名在該縣舊城村搶掠此外晉州藁城肅甯等處亦有匪徒竄擾又滄州臬匪蕭麥秋鹽山縣臬匪李四鍋腰率眾千餘人闖入靜海縣屬之北港各灘搶掠鹽場焚毀汎房畿南河間一帶土匪尙未肅清復有安平等處匪徒滋

擾偏近省垣若不及早殲除必致釀成巨患僧格林沁等見禁中
頂著卽調集各兵亟籌剿辦如河間一帶尙不能立時蕆事卽酌
量分兵各路掩捕務期盡數捕滅勿任蔓延以安良善而靖地方
將此由六百里諭令知之○諭前經降旨諭令穆騰阿來京幫辦
勝保軍務茲據袁甲三穆騰阿奏該都統見已挑選馬隊官兵一
百三十員定於九月二十四日啟程惟此時京城安堵如常皖捻
勾結粵匪竄擾淮南一帶勢復熾張穆騰阿著毋庸來京赴援卽
行統帶馬隊官兵迅速折回袁甲三軍營會同袁甲三鄭魁士剿
辦粵捻各匪以期力遏兇鋒將此由六百里諭令知之○以安徽
軍營需餉命山東河南江西各巡撫將部議撥款迅速解往並撥
江西新漕折色十萬石○戊辰諭內閣瑞常等奏飭查殉難紳民
一摺八月間淀園被擾內務府員外郎泰清全家自焚殊堪憫惻

所有秦清家十六口殉難情形著內務府查明分別奏請旌卹其餘近畿一帶殉難紳民著八旗都統順天府直隸總督迅速查明具奏以彰節義至各處遺骸亦堪矜憫並著順天府暨營城各地方官員迅卽掩埋毋令日久暴露○諭軍機大臣等本日據僧格林沁奏山東捻匪鴟張擬於畿輔一帶土匪辦有頭緒後卽行帶兵南下見咨調勝保營陝甘官兵四千名助剿一摺復據勝保奏稱該營所存兵勇統計不過八千餘人無可分撥等語見在山東濟甯泗水等處雖經解圍而大股捻匪七八萬分路四竄兗沂曹濟秦各屬二十六州縣紛紛告警嚴計山東見有兵力實屬不敷攻剿且直隸河間一帶土匪尙未肅清復有安平匪徒滋擾偏近省垣此外晉州藁城肅甯滄州鹽山各處匪徒蠭起畿南一帶地方尤關緊要自應先其所急著勝保將陝甘官兵四千名迅速撥

赴僧格林沁瑞麟軍營以資攻剿毋稍延誤將此由六百里各諭令知之○己巳諭軍機大臣等文煜奏西路擒匪肅清見赴東路查探剿辦一摺擒匪自濟甯州城解圍後四路分竄被兵勇追擊各由荷澤等縣渡河竄回老巢曹單一帶已無賊蹤文煜見駐泰安已撥兵赴鄆鉅一帶搜捕土匪安撫居民該撫擬卽由泰安赴沂州察探東路相機進剿等語擒匪竄擾東省蔓延二十餘州縣此拏彼竄飄忽靡常並未大受懲創西路旣已肅清其東路賊匪尙在沂州一帶肆擾德楞額見帶團取道蘭郟屬之馬陵山從旁鈔襲著文煜卽帶所部兵勇與之會合夾擊偪令回巢其恆齡一軍雖令折回並著文煜知照傳振邦揀派得力將弁會同該撫之兵迎頭截剿總期一律肅清勿令擾及完善將此由六百里諭令知之○予山東陣亡訓導張書紳等祭葬世職○以浙江嚴州府

城被賊竄陷革知縣李長齡職予陣亡副將封九貴祭葬世職○
辛未諭內閣劉長佑奏越南國入貢屆期察看道路情形請旨遵
行一摺見在廣西南太潯梧等府軍務未竣道路尙多梗阻所有
越南國丁巳辛酉兩屆例貢著暫行展緩俟該省軍務平靖後再
由該撫具奏○諭前諭直隸等省辦理團練均已次第舉行茲據
侍郎梁瀚奏甘肅地方緊要請飭一律辦團並酌保官紳開單呈
覽一摺甘肅壤控西陲地方遼闊且與陝西四川毗連見在四川
滇匪未靖自應一律舉辦團練以靖邊陲所有甘肅省團練事宜
卽著陝甘總督樂斌督辦並著甘涼道蕭浚蘭丁憂刑部員外郎
吳可讀江西候補道楊昇幫辦團練○諭辭煥奏克復縣城等語
賊匪竄踞江陰縣城經靖江縣知縣齊在鎔署通州知州張富年
並都司龔致福等統帶艇師及兵勇民團將內河賊匪木牌礮船

轟毀並將城外礮臺奪獲九月初四日兵勇鈔入東門將城中逆匪擒斬淨盡立將縣城克復所有在事出力人員著准其擇尤保奏以示鼓勵○諭軍機大臣等本日據恭親王奕訢等奏俄酋所稱伊國欲送中國槍礮一節前已由理藩院行文令其由陸路運至庫倫此次欲派該國官數員帶匠役來中國教導在西北兩路距京較遠地方請中國派員帶同兵丁數名前往學習製造演放諸法請旨遵行等語該夷既有此意自係有心見好未便遽行阻絕著奕訢等一面行文知照俄酋令其將槍礮送至恰克圖地方卽由內地派弁兵運回京師省其自備經費以示和好之意一面於京營內遴選熟習槍礮兵丁並奏派大員帶往恰克圖卽於該處認真學習演放各法輪番更替以期技藝純熟○諭本年換約退兵俄羅斯使臣伊格那提業幅亦卽隨後換約該酋見恭親王

奕訢等面稱髮逆在江南等處橫行請令中國官軍於陸路統重
兵進剿該國撥兵三四百名在水路會擊必可得手又稱明年南
漕運京恐沿途或有阻礙伊在上海時有米國商人及中國粵商
情願領價採辦臺米洋米運津如令伊寄信上海領事官將來夷
船沙船均可裝載用俄米旗幟卽保無虞等語中國剿賊運漕斷
無專借資外國之理惟思江浙地方糜爛兵力不敷剿辦如借俄
兵之力幫同辦理逆賊若能早平我之元氣亦可漸復但不可不
思患豫防佛蘭西在京時亦有此請著曾國藩等公同悉心體察
迅速奏明候旨定奪至代運南漕一節江浙地方淪陷明歲能否
辦理新漕尙無定議然漕糧爲天庾正供自不可缺所稱採辦運
津之說是否可行應如何妥議章程辦理之處並著曾國藩辭煥
王有齡酌量情形迅速具奏○予江蘇殉難同知吳德照等祭葬

世職○壬申諭內閣德楞額等奏迎剿擒匪偏入江南仍督隊追襲一招本月初二日擒匪由馬陵山竄撲郟城縣境經德楞額等督同兵勇奮力迎剿斃賊百餘名生擒三名其北來一股復由港口渡河鈔襲官軍後路適都統穆騰阿帶兵北來乘勢夾攻官軍勇氣倍加復斃賊數百名生擒七十餘名旋因天晚撤回城下該逆乘夜來撲復被槍礮轟斃多名遂由港口渡河西竄官軍追入江南邳州境內沿河追擊疊有斬擒剿辦尙屬認真著卽會同傅振邦所派兵勇前後夾擊悉數殲除毋任遠颺致畱餘孽○辦理江南糧臺江蘇記名道江清驥奏糧臺事件可否自行陳奏得旨凡關涉糧臺事務著照前案由汝具奏○癸酉諭軍機大臣等本日據樂斌奏酌帶官兵赴京並英桂請赴行在陛見各一摺見在夷氛已退樂斌著帶兵折回甘省英桂亦毋庸馳赴行在陛見卽

回山西辦理勸捐籌餉及地方各事宜○諭慶端奏賊蹤闌入瀘
安浙東軍情緊急請飭毓科抽調林福祥所部各軍馳赴三衢堵
剿等語見在浙東嚴州府城已被逆匪攻陷情形危迫待援孔殷
閩省援浙兵勇已先後派往一萬餘名勢難再行續調升任福建
臬司林福祥見在江西帶兵所部定武軍及親兵營素稱得力著
毓科迅飭林福祥於所部兵勇內抽調二三千名派得力員弁管
帶星馳赴浙援剿應用糧餉軍火並著該撫迅速籌備固三衢之
門戶卽以保豫章之藩籬務期不分畛域趕緊籌辦毋得遷延推
諉致誤事機將此由六百里諭令知之○暫革左副都御史張芾
奏請應否來京或回籍守制得旨著卽行回籍補行守制汝年尙
壯將來報效爲日正長朕自中秋抵承德後身體安健特諭汝知
○毛昶熙奏臣馳抵豫省辦團訪問光州屬境有積年捻首趙廣

合陳得一等聚眾滋擾翰林院庶吉士吳元炳回籍力行團練就
近商同各州縣設法緝拏旋與光州知州祝塏等擣破賊巢將趙
廣合等悉數拏獲得旨獎敘○予貴州殉難在籍翰林院檢討但
鍾良知縣但蔭良祭葬世職○乙亥諭軍機大臣等德楞額奏擊
退圍攻重豐賊匪見催援軍併力夾擊一摺捻逆圍攻重豐民圩
經德楞額等督兵追剿立將該逆壓退惟追躡失利色爾固善受
傷賊眾兵單未能得手大股賊匪尙在邳州一帶恐其渡河紛擾
冀圖北犯著文煜卽飭各路官軍自滕縣迎擊並飭富新移營前
進會同郝上庠督帶民團合力兜擊德楞額亦當激勵士卒會合
夾擊並飭沿途州縣統帶民團併力鈔截毋令北竄將此由六百
里各諭令知之○予淀園殉難員外郎秦清六品苑丞秦衷祭葬
世職○丙子福建陸路提督李若珠奏龍袍洲賊匪分竄瓜楊兜

勦獲勝得旨此次獲勝自係賊壘尙未堅定若再有大舉必以全力撲犯著嚴督勦辦勿令下竄一步○丁丑諭內閣翁同書奏遊擊之母訓子有方懇恩獎勵等語副將銜候補遊擊孫之友之母孫劉氏先命其子率眾投誠嗣因逆犯亳州復令登陴固守克保危城該氏年逾七十深明大義實屬可嘉孫劉氏著加恩照其子副將升銜給予二品封典以爲母訓克端者勸○諭軍機大臣等本日據僧格林沁等奏查辦直隸土匪情形並擬移兵東省勦辦捻匪各摺片僧格林沁等自行抵河間後經各地方鄉團會同兵役陸續緝獲土匪分別正法各匪以次解散該大臣擬卽督帶馬步各隊取道東昌以次南下勦辦捻匪瑞麟暫駐河間等候後起兵丁其衡水靜海等處已札飭冷慶許誦恆等帶兵梭巡彈壓並令各州縣查明出力鄉團鼓勵所籌均尙周妥卽著照所擬辦理

山東擒匪曹州一帶已報肅清尙有大股擒匪擾及嶧境德楞額所帶兵勇失利已諭文煜會合該副都統迎前截擊杜其北犯該匪飄忽無常避實乘虛是其慣技此次深入東境蹂躪二十九州縣並未大受懲創該大臣行抵東豫後必須會合兩省兵力進擣匪巢以期一鼓蕩平是爲至要將此由六百里各諭令知之○諭前據僧格林沁等奏不日帶兵南下請調勝保營陝甘官兵四十名復據勝保奏稱兵力無可分撥當經諭令勝保將此項官兵迅速撥赴僧格林沁等軍營矣本日據僧格林沁等奏直隸土匪漸次解散擬卽由河間取道東昌剿辦擒匪俟續調陝甘官兵到齊卽行前進並稱勝保擬勻撥川楚勇各二千名恐難得力各等語僧格林沁移兵東省剿辦擒匪亟應厚集兵力以壯聲威此項官兵若畱於勝保軍營徒事防守未免可惜著勝保仍遵前旨將前

項陝甘官兵四千名迅速撥赴僧格林沁軍營以資攻剿而利遄行毋得延誤該大臣所調河南川楚各勇三千名並著酌量撤回原省以節糜費將此由六百里諭令知之○諭僧格林沁等奏請裁減兵額等語據稱本年天津海口一帶接仗察哈爾官兵首先潰敗實屬不堪調用而該處兵額最多若不量予裁減必致虛糜糧餉所籌自係爲節省經費起見著慶昫查明該處兵額共若干名其分撥各臺者若干游牧者若干汰除老弱簡擇精壯尙可練習者若干應如何酌量分別裁減之處卽著妥議具奏將此諭令知之○諭見在各省文報遞至良鄉縣後轉遞京城再由兵部遞交順義縣接遞行在未免耽延時日著恆福卽飭良鄉縣於接到文報時徑遞順義縣接遞毋庸由京轉遞如該二縣相距程途稍遠卽於中途添設腰撥以免稽延將此諭令知之○浙江巡撫王

有齡奏請畱何桂清會辦浙防得旨所請斷不准行○命湖南在籍前任陝甘總督易棠內閣學士周玉麒翰林院侍讀學士丁善慶幫辦團練○予安徽陣亡州判陳建章等浙江殉難參將銜胡應元等江蘇傷亡副將余兆清祭葬世職○戊寅諭軍機大臣等前因德楞額奏擒匪在邳州一帶搶渡運河擾及嶧境當經諭令文煜督飭各軍由滕縣會合德楞額之軍併力夾擊本日據文煜奏擒匪見由江南贛榆縣之青口折回仍在蘭郊嶧邳交界屯聚並據探聞該匪南撲邳州之窯灣以江南團練堵禦未能過河折赴台莊迤東三里之黃林莊頭起已過運河因上流水發餘匪尙在邳嶧一帶游奕等語匪蹤飄忽無常此拏彼竄是其慣技亟宜痛加剿洗以期盡殲醜類文煜見已行抵沂州著卽督飭各路兵勇會合德楞額之兵認真剿擊邳嶧一帶遊匪悉數殲除並著王

夢齡飭令派出各員弁迎頭堵剿毋任滋蔓將此由六百里各諭令知之○己卯賞還前任倉場侍郎崇綸家產○庚辰諭內閣前因慶廉奏參藩司賈臻膜視軍餉當經諭令慶廉嚴飭該司迅籌報解儻敢仍前玩泄卽著嚴參懲辦茲據賈臻奏參慶廉貪婪欺罔舉止乖謬各情慶廉賈臻以撫藩大員互相參奏必應嚴切根究以肅官箴慶廉賈臻均著卽行撤任交新任河南巡撫嚴樹森秉公查辦毋許瞻徇○諭軍機大臣等文煜奏捻匪被擊竄回老巢東境肅清擬回省辦理夷務一摺此次逆捻出巢由東省魚臺金鄉渡河經各州縣團勇會合官軍極力堵禦將該逆擊竄回巢東境一律肅清文煜著卽回省仍著分派員弁搜捕土匪並安撫難民無令失所見在英佛各國條約業已通行各省俟該酋行抵登州卽著文煜前往海口悉心籌辦通商事宜以期永遠相安此

次擒匪竄入東境係由魚臺金鄉一帶該處係何員帶兵駐紮防堵不力有應得之咎著文煜查明參奏本日據袁甲三奏總兵張得勝帶勇北上截畱山東應否飭令回營等語見在撫局已成張得勝所帶兵丁毋須北上袁甲三軍營正當攻剿喫緊之時文煜卽飭該總兵回營助剿將此由六百里諭令知之○諭前因江陰縣城克復宜有重兵守禦諭令巴棟阿於鎮江大營內抽撥一軍迅赴江陰屯守茲據巴棟阿奏稱原擬抽調兵勇三千名前往江陰駐紮旋因大股逆黨自句容等處竄至湯崗築壘侵犯鎮城見將分派江陰之軍撤下一千五百名畱備防守以一千五百名飭副將富陞管帶前赴江陰一面咨行李若珠於江北軍營撥兵一千五百名同赴江陰駐紮等語鎮江附近一帶逆黨麇聚該處防務緊要勢難多撥兵勇分駐江陰著李若珠於江北大營內迅撥

精兵一千五百名派委得力鎮將帶赴江陰會同鎮將所派兵勇駐紮該城嚴密防守毋得遲延推諉致誤事機將此由六百里諭令知之○諭恭親王奕訢等奏英國欲於長江通商業經給予照覆允准一摺長江通商一節八年原定和約內載明除鎮江一年後立口通商外其餘自漢口沿流至海各地選擇不逾三口准爲夷船出進貨物通商之區今該國以撫局已成欲先赴漢口九江兩處開商應納稅餉或在上海鎮江各關按照新章交納並據該酋照會內稱先向海關報明護船兵器火藥鉛彈等物請給照單該關口查明所報軍器數目如在情理之中卽註明給發僅有額外軍器或並無照單私行售賣者卽將該船所載貨物全行入官並驅逐該船出口不准在江面貿易各等語業經恭親王等允其咨照湖北江西督撫矣惟漢口九江兩處係屬通商冊始所有一

切章程必須按照條約與之妥爲商定以期永遠相安其進口出口應納稅餉恭親王已令其與上海關公同商酌亦須明定章程免致稅課虧短至該洋船所帶兵器火藥等已據聲明在海關呈報均須嚴密稽查照章辦理其經行江面地方所有防守弁兵俱應飭令一體知悉毋得滋生疑慮以致別啟釁端著官文胡林翼薛煥毓科巴棟阿李若珠等悉心妥辦總期杜漸防微而又不至有傷和好此爲至要○曾國藩奏臣接奉諭旨飭令統籌緩急機宜臣查規復蘇常分救鎮江上海皆臣職分最要之事惟嘉興潰而浙中無牽制之師金壇常昭陷而江左有長驅之勢見皖賊之分竄浙江者又疊陷嚴州各城浙江之衢州江西之廣信紛紛告急且探得逆首陳玉城等各賊由北岸廬六一帶上犯李侍賢等各賊由南岸徽池一帶上犯急救安慶之圍計甚兇狡查東流建

德毗連饒州景德鎮賊若乘虛竄入則江西大局俱爲掣動幸左宗棠一軍於九月十五日行抵樂平臣商令暫駐該縣如饒州有警則赴西北截剿廣信有警則赴東路截剿並飭鮑超張運蘭按營進攻休甯已於九月二十九日獲一勝仗以目前情形而論必須將各路防兵布置穩妥仍分一軍由開化華埠橫出外則與張玉良等夾擊嚴州之賊內則與鮑超等夾擊徽州之賊使之退出嶺外然後江西可保浙省可安而皖南之立腳可定若責臣專謀皖吳卽將皖南設法經營臣當於今臘明正親率馬步數千由皖北繞赴淮揚就近與薛煥巴棟阿會合聯絡相機策應仍一面嚴防北竄之路以維全局又奏九月二十九日鮑超張運蘭各軍會攻休甯鮑超於卯時出隊並派各軍分路鈔擊踏毀賊卡三座斃賊四五百人乘勝追至城下賊由東門繞至北門迎戰復出大股

接應婁雲慶鈔其歸路將賊截作兩段余大勝等督隊圍殺又斃七八百人餘賊逃回堅伏不出張運蘭是日先派左右翼穩紮潭口以防旌太來路令陳青雲等兩路進攻該道自率中軍馬步與諸將會於榔市攻破馮家嶺賊卡一座又進攻榔市賊卡其卡前有兩壘一村適劉光明易開俊攻破龍源賊卡齊至夾擊遂將村壘毀平追至城邊斃賊三四百名生擒十三名解散脅從無算見聞逆首楊雄青等各率死黨意圖救援已嚴飭該鎮道等偪賊緊攻兼防後路援賊勿涉疏懈均報聞○命左副都御史銜順天府府丞毛昶熙督辦河南勦匪事宜○以嚴樹森爲河南巡撫未到任前以河東河道總督黃贊湯暫行兼署以唐訓方爲湖北布政使裕麟爲湖北按察使由廣東鹽運使遷○以邊浴禮爲河南布政使鄭元善爲河南按察使由南汝光道遷○辛巳諭軍機大臣等瑞昌王有齡

奏續陳近日軍情請將江西援浙兵勇暫畱堵剿並請將劉于溥
所部兵勇暫緩遣散一摺前因毓科奏江省上下游同時告警請
將援浙各軍調回堵剿業經諭令瑞昌等飭令道員彭斯舉等各
率所部兼程回江援剿茲據瑞昌等奏稱粵逆見由清安一帶擾
及威坪回竄蜀口徽州北路之賊亦竄至杞梓里三陽坑等處昌
化衢州一帶防務空虛張玉良已統率所部進剿嚴郡彭斯舉等
分駐海甯海鹽等處防堵嘉興南竄賊匪未便撤動請將彭斯舉
劉芳貴劉長培等軍暫行畱浙並請飭曾國藩毓科將劉于溥陸
軍暫緩遣散等語浙省此時賊氛甚熾防剿在在需兵江西林福
祥劉于溥各軍尙稱得力左宗棠新募勇丁見駐樂平亦足爲該
省聲援所有彭斯舉等援浙兵勇著毓科暫緩調回如果江西防
務需用甚殷卽著咨商瑞昌王有齡等調回一半以資防堵其劉

于潯所部陸軍卽著曾國藩毓科暫緩遣散以厚兵力將此由六
百里各諭令知之○命荊州將軍都興阿督辦江北軍務福建陸
路提督李若珠幫辦○王子諭軍機大臣等前據文謙奏每月酌
撥僧格林沁軍營月餉銀二萬五千兩當經諭令僧格林沁等查
明該藩司所擬月撥之款是否足敷支放本日據僧格林沁等奏
見在需餉每月總在六萬之數抵豫東後尙須添兵以馬步官兵
二萬名覈計每月需銀十萬兩文謙擬撥月餉二萬五千兩僅敷
數日之用而山西自春夏之間每月撥解銀二萬兩數月以來未
據報解請飭各該省寬爲籌備並按月解交等語僧格林沁等統
兵南下需餉甚急亟應迅籌接濟以期士飽馬騰著黃贊湯文煜
文謙於各該省寬爲籌備源源接濟每月總須湊成十萬之數其
山西省月撥之二萬兩並著英桂撥解毋稍稽延至僧格林沁馬

步官兵業經分起前進文謙解到銀二萬兩支放已竣並著文謙查明庫存部餉未解京者尙有若干酌量提解僧格林沁軍營以濟要需嗣後各省解京餉銀並著飭令源源解部勿稍遲緩將此由六百里諭知黃贊湯文煜英桂並傳諭文謙知之○丙戌諭內閣傳振邦奏官軍擊退竄匪大獲勝仗一摺捻匪竄擾山東鉅野縣時經總兵田在田調齊副將胡元昌等會合鄉團剿堵兼施立將濟甯以西賊股由曹縣等處擊回其由沂州回竄之匪屢撲邳州城圩經城內兵練及各鄉團並出堵截疊有斬擒該匪復由東北直撲徐州城垣田在田與署總兵李恆清等進剿追殺十餘里匪勢不支紛紛潰散自相踐踏均由蕭縣以西遁去計斃賊三四百名奪獲羸馬槍礮旗幟無數救出難民車輛尤多剿辦尙爲得手所有徐州三次守城出力之文武紳練及兩入東境剿匪之尤

爲出力各員均著准其分別酌保候朕施恩○諭軍機大臣等前據毛昶熙奏捻首孫葵心欲由布政使賈臻受撫當經諭令該大臣責成該藩司悉心經理本日據賈臻奏皖境著名捻首渦河之南以孫葵心爲大股河北以劉狗爲大股如孫葵心就撫則劉狗亦可招降由此辦理得手則江皖東豫可望肅清惟散遣酌畱及籌給口糧等事均應妥議章程稍涉稽延恐致貽誤請准單銜奏事並俟孫葵心具稟到日擬卽赴歸陳一帶籌辦等語昨因賈臻與巡撫慶廉互相參奏業將該藩司撤任交新任巡撫嚴樹森查辦惟招撫事宜至關緊要孫葵心於該藩司深爲感服自未便易人辦理兒該藩司已派遊擊陳奇金持札前往開諭如孫葵心實係真心就撫具稟前來卽著賈臻前赴歸陳一帶擇地駐紮相機妥辦其如何分別畱遣及籌給口糧等事宜均著妥議章程仍隨

時稟商毛昶熙辦理並著毛昶熙隨時奏聞該藩司毋庸單銜具奏將此由五百里諭令知之○督辦徐宿勦匪事宜雲南提督傅振邦因病賞假命山西太原鎮總兵官田在田暫行接辦江南淮徐道吳棠暫行幫辦○以辦理團練不洽輿情撤在籍漕運總督邵燦督辦浙江團練大臣並撤道員章嗣衡等幫辦○丁亥諭內閣田興恕奏官軍勦賊連獲大捷克復甕安縣城見擬督兵赴省一摺逆匪盤踞籠溪勢甚猖獗田興恕飭副將沈宏富等各率所部相機進剿八月十二日楊巖寶等分攻左右各寨賊匪出營迎敵我軍奮力衝殺斃賊無算立將籠溪賊巢攻破十六十七等日又將水溪望巖門新土小泥田構子坪五處賊營十餘座次第攻克副將劉吉三等進攻三角莊殺賊一千餘名參將李有恆進剿大寺頂之賊三獲勝仗斬擒甚眾八月二十四日田興恕親督長

勝軍徑紮龍溪逆匪糾約三萬餘人分路來撲我軍截住該逆歸路兵勇分投衝出迎敵窮追二十餘里斃賊二千餘名我兵一無損傷九月十一日冒雨進攻參將羅孝廉等奮不顧身飛登賊牆大兵繼進攀附而上殲除逆賊殆盡卽乘勝直撲松坪前後夾擊斬馘四千餘名乘勢攻克猴坪賊巢是日三戰三捷踏破賊營七十五座陣斬僞扶明王石大魁僞元帥僞將軍十餘名拔出難民二萬餘名解散餘黨二萬有奇十八日踏毀紅崗堡賊營後直抵張安殺斃黃衣紅衣賊目數名斬獲不計其數立將縣城克復此次官軍進剿計兩旬以來連獲大捷殺賊二萬數千收復地方三百餘里赴省大路已通著卽乘此聲威殲除餘孽○諭軍機大臣等慶廉奏擒匪竄撲鹿邑縣城迎擊獲勝見擬出省堵剿一摺亳州大股擒匪萬餘人竄入鹿邑縣境攻撲城池經記名道趙連標

等會同毛昶熙所派勇練擊退殺斃多名匪眾仍竄回毫境老巢
惟賊情狡詐股數眾多難保不去而復來亟須督兵大員前赴歸
陳一帶相機堵截慶廉見在因案撤任業已派毛昶熙督辦剿匪
事宜著卽速行出省馳赴歸陳邊境整飭團練厚集兵力相機堵
剿以固邊圉慶廉調回之北路援兵俟到齊後統歸毛昶熙管帶
將此由六百里諭令知之○諭孔繁瀨奏南捻竄擾曲阜土匪乘
機勾結適總兵富新等帶兵踵至派隊剿辦賊已遠竄惟土匪桂
錫楨等未獲且濟甯等處復見賊蹤誠恐突然再犯請畱富新駐
紮曲阜保衛 林廟並可策應曹濟控制滕嶧等語曲阜爲 聖
賢林廟重地自應妥籌保衛惟見在東境業已肅清卽有零星土
匪該處地方文武自當上緊緝拏毋令滋擾若畱富新一軍駐紮
該處恐以有用之兵置之無賊之地未免可惜儻該縣駐有重兵

實足以西應曹濟南控滕嶧則

林廟既資保衛於通省軍務亦

有裨益自可照議辦理如他處尙須調令防剿亦未便令其株守
一處所有總兵富新應否駐紮曲阜之處卽著文煜斟酌情形據
實具奏將此由六百里諭令知之○恭親王奕訢等奏呈進俄人
地圖並請派員履勘得旨互換和約著收存禮部備查毋庸齎赴
行在至明歲季春赴吉林查勘分界事宜應派何人前往方昭妥
慎著恭親王酌擬請旨○予貴州陣亡副將劉吉三等祭葬世職
建祠○戊子諭內閣薛煥奏賊匪圖犯金山等處疊擊獲勝一摺
十月初五日賊撲江蘇金山縣洙涇鎮等處經總兵曾秉忠派守
備楊貴福等會合金山縣知縣周紹廉等併力扼剿曾秉忠復親
督各船迎頭截擊擒斬悍匪甚多遂將楓涇鎮收復該逆又糾約
蘇常大股徑撲廣富林圖犯松江時曾秉忠甫自楓涇收隊回泊

龍王廟當於初六七等日分三路進攻慶戰三時賊匪大敗死者不可勝數該逆大股復集寶山縣所屬之羅店鎮經都司姜德分爲三隊設伏誘賊出戰自率中隊當先繼令左右兩隊夾擊賊不能支餘逆竄遁勦辦尙爲得手福建汀州鎮總兵曾秉忠著遇有提督缺出題奏所有在事出力將弁著薛煥查明擇尤保奏候朕施恩至廣福林官軍水陸並退雖因眾寡不敵究係防勦不力副將向奎遊擊陳貴守備薛廷輝均著摘去頂帶遊擊虎崑揚經該署督飭令赴援松江並不卽日啟程旋又聞警耽延著一併摘去頂帶以示薄懲而觀後效○命太常寺少卿焦祐瀛在軍機大臣上學習行走○是月蠲緩廣西橫州等四十九漢土廳州縣被擾地方額賦湖南澧州等九州縣暨岳州衛被水莊屯新舊額賦並碾常平倉穀撫恤貧民

十一月辛卯諭內閣勝保奏請專派大員防河等語直隸大順廣道聯捷著專辦防河事務准其奏事其直隸之大名順德廣平河南之彰德衛輝懷慶各府應辦防河事宜均著妥爲籌辦嗣後如有捻匪偷渡河岸惟該道是問其濱河各該地方官有怠荒疏失及不遵調遣者准其指名參奏以專責成○諭軍機大臣等邵燦王履謙奏籌畫團練經費並防堵錢塘江口情形一摺逆匪業竄桐廬溫處台及甯紹等屬處處可通浙東完善地方亟宜力圖保護邵燦見已撤去團練大臣所有派防江口之餘姚練丁爲數不多恐難堵禦著王有齡迅卽調集兵勇嚴行防守毋令該逆紛竄至甯波道府縣所辦釐捐等項據邵燦等奏稱多有不實不盡著王有齡卽行徹底查明認真整頓務令絲毫無紊歸公用毋任隱匿侵吞將此由六百里諭令知之○以巡幸熱河免經過地方本年

額賦十之四○劉長佑奏石逆及賴賴新擁眾二萬圍攻南甯府城初以馬隊衝突繼又開挖地道城中守禦嚴密計無所施遂環築木柵意圖久困道員吳德徵激勵兵勇大集團練內外夾攻縱火焚寨殲擒賊匪千餘名餘悉竄回武緣縣知縣周瑄督飭團練分投圍擊殲賊多名匪黨由賓州上林四散分竄賴賴新復率數千人竄入宣化縣境又糾約潯州艇匪攻撲永淳縣蘇梁張各村經吳德徵飭軍功孫仁廣督勇截擊擒斬數百人賊眾敗竄下游其竄往遷江忻城者約眾數萬由柳州屬之來賓馬平慶遠屬之折城宜山竄至融縣各該地方團練節節兜截殲斃數千人逃出難民七八百人據供該匪等實欲逃回湖南江西其石達開蹤迹極爲詭秘見在滬入何處未能得實臣卽咨湖南貴州江西各撫臣豫爲戒備見在該匪等尙踞板攬一帶擾近永甯臣飭劉坤一

派軍扼其後一面抽撥數營令總兵李明惠統帶取道桂林馳往迎截行抵義甯該匪探知大軍進剿又由懷遠斗江奔竄闖入綏甯境內武岡新甯各州縣均形喫緊查湖南寶靖一路見止江忠義一軍不敷剿辦亟應由粵跟追前關後壘合而殲旃惟楚軍從征年餘士多疲憊劉坤一見甫整飭一新糧餉萬分支絀徵調維艱臣親至義甯行營激勵李明惠等面授機宜旋因李明惠患病留醫接據江忠義馳函呼助迫不可待遂親督各勇進赴龍勝廳派令間道入楚相機會剿得旨石賴各股勿令其死灰復然赴楚追剿務須一鼓殲除○以捐輸軍餉永廣山東鄉試中額二名淮縣學額九名濟甯八名黃縣六名厯城四名新城單聊城膠各二名章邱長清德荷澤曹益都臨淄壽光安邱諸城掖高密福山甯海臨清各一名江西建昌十名○癸巳諭軍機大臣等有人奏勝

保前次行文各路語多失當等語勝保行文各路有京營禁旅蒙古番騎非初歷戎行卽素性怯懦之語自係倉卒之間措詞未能斟酌以致遠近傳聞不無駭異至李世忠苗沛霖兩人於該大臣頗知悅服卽有書信往來惟當宣示朝廷德威使之益加馴服若機事不密恐令所部各勇有藐視官軍之心致難駕馭該提督等於該大臣之言尙能聽信卽著將見在和約旣換以後可以相安無事及近京土匪漸就肅清格林沁等業已統帶大兵前赴東豫勦辦捻匪等情函致並屬該提督等同心勦力報效朝廷毋得爲浮言所惑是爲至要將此由五百里諭令知之○袁甲三奏夷患稍紓亟宜力圖整頓以杜禍患而固根本得旨精訓練儲將才二條著總理行營王大臣妥議具奏又奏燕京爲天下根本不可輕議遷徙批所奏甚是○駱秉章奏臣率師赴蜀正擬分隊拔營

署撫

臣

翟誥

咨稱

石逆

大股

由融縣

闖入

楚境

綏甯城

步兩城

失

陷

見復

圍攻

武岡

分竄

新甯

並有

另股

竄擾

洪江

該逆

狡悍

異常

必須

厚集

兵力

庶足

遏截

兇鋒

湖南

見在

兵不

滿二

萬各

處分

布

殊形

單薄

請暫

移援

蜀之

師先

剿湖

南之

賊並

據劉

嶽昭

稟稱

武

岡被

圍湘

寶一

帶空

虛人

心震

動紳

民兵

勇願

請先

滅此

股然

後

入川

請示

遵行

各等

情

臣

查石

逆兇

狡冠

於諸

賊上

年竄

往粵

西

原非

該逆

本意

其垂

涎楚

蜀已

非一

日今

既大

股乘

虛竄

楚且

聞

與四

眼狗

陳逆

相約

圖犯

兩湖

自不

得不

先其

所急

已飭

劉嶽

昭

由湘

鄉寶

慶進

剿飭

黃瀆

熙卜

宗銓

出安

化新

化間

道確

探賊

蹤

會合

夾擊

萬一

賊勢

西趨

竄蜀

即可

繞出

賊前

關頭

迎剿

一俟

湖

南軍

務稍

鬆卽

調各

營迅

於常

德取

齊

臣

督帶

赴川

以紓

皇上

西顧

之憂

得旨

近年

四方

多故

湖南

諸軍

出力

爲多

若遽

移師

西

尚恐內顧憂繁轉難得力著暫准所請俟軍務稍緩卽迅速統帶
赴蜀○安徽巡撫翁同書奏時事方亟敬陳管見一謹天戒二固
邦本三收人才四練京營五爭形勢得旨收人才一條利少弊多
無庸議餘具覽悉將隨時措施矣○莊受祺以病免以林福祥爲

浙江布政使黃安綬爲福建按察使

由汀漳龍道遷

○甲午諭軍機大臣

等瑞昌等奏新城等縣失陷省城危急力籌堵剿一摺逆賊竄陷
桐廬後新城臨安富陽三縣城池相繼失守省垣情形危急馬得
昭等軍較爲得力爲嘉興之賊牽掣未能撤回該將軍等見調張
玉良等由嚴州轉戰而下使賊顧後路不能遽行深入所籌尙妥
至省城內外兵勇尙有一萬餘人兼之旗營駐防官兵深明大義
素稱得力著瑞昌王有齡督飭該弁兵等協力同心認真防堵不
得稍涉鬆懈浙東地方尙屬完善瑞昌等見飭訓字營官兵回顧

諸暨其蘭谿等處民團亦能擊賊並著飭令該地方文武會同團練於沿江一帶實力巡防務須上下游聲勢聯絡勿使逆蹤闌入將此由六百里加緊諭令知之○諭前據慶端等奏調派援浙總兵曾玉明統帶兵勇業已馳抵三衢著卽飛飭該總兵督率援師會同張玉良並道員彭斯舉各軍迅由上游嚴郡一帶轉戰而下與省垣兵勇互相夾擊以期力保危城儻曾玉明所部閩師尙形單薄卽著慶端等迅速添調兵勇星夜赴浙應援並著將閩師餉銀速行籌撥源源接濟毋令缺乏閩浙兩省脣齒相依該督等務當不分畛域力顧東南大局毋使逆蹤闌入將此由六百里加緊諭令知之○乙未諭內閣王夢齡奏擊退大股粵逆三河衡陽一帶肅清一摺粵逆麇聚三河等處於十月十四日由龍岡馬壩一帶直逼河岸意圖搶渡經官兵開礮轟擊斃賊千餘名十八日逆

眾復至三河搶渡兵勇槍礮齊施斃賊無算逆勢不支向東南竄逸其分撲衡陽黎城之賊經官軍於十六日分投堵剿並將擄船偷渡之賊擊沈五六千人賊匪全行遁去剿辦尙屬得手所有出力之文武兵練並海沭邳宿等防河守城出力之員弁兵勇著王夢齡一併查明擇尤請獎以示鼓勵○諭王夢齡奏請將防湖水師統歸節制等語記名總兵黃開榜所部防湖師船著准其歸王夢齡節制以一軍令所需水師口糧卽由清淮籌防局接支○諭軍機大臣等據邵燦王履謙奏富陽失守長江無險可憑已飛調甯波廣艇由海入江並令已革臬司段光清統帶所需糧餉卽責成該革員向甯波地方設法籌應另片奏義橋等處民團擊賊出力請准存記彙保並請派地方大員幫辦團練各等語本日已明降諭旨將段光清暫緩鞫問責令戴罪自效卽著瑞昌王有齡王

履謙督飭該革員將甬波廣艇星夜統帶入江一面會合彭斯舉等陸路官軍及沿江上下游團練防守江面力遏賊匪東竄毋得稍涉疏懈其義橋江口及滙海所三江口等處擊賊出力各民團均著准其存記俟續有勞績保奏前因邵燦撤去督辦團練大臣諭令王有齡保舉公正紳士數人候旨見在幫辦道員史致諤既據邵燦等奏稱久未到浙襄理乏人著王有齡於該省司道知府內酌保一員與所保紳士均俟奏到之日降旨派辦團練將此由六百里加緊各諭令知之○以辦理各國和約完竣恭親王奕訢下宗人府從優議敘大學士桂良戶部左侍郎文祥下部優敘餘升敘有差○以浙江軍務緊急准已革按察使段光清畱營效力○命山東巡撫文煜山西巡撫英桂於山東運庫山西河東道庫酌撥清淮軍餉○丙申諭軍機大臣等穆騰阿奏請飭伊興額迅

赴徐州督剿擒匪等語已革副都統伊興額前在徐宿一帶剿匪深得民心該革員見已賞給六品頂帶在僧格林沁等大營著該大臣等體察情形如無須伊興額帶隊卽著飭令迅赴徐州聯絡鄉團剿辦擒匪以順輿情而固眾志至皖北擒匪雖經遁歸老巢兇據穆騰阿奏稱該逆聲言明春正二月間擒首孫葵心仍擬率眾撲犯東省僧格林沁見已督兵馳抵東昌若徑由歸陳一帶南下恐東省空虛無以遏該匪北竄之路著卽於濟甯兗州一帶擇要駐紮先將北路妥爲布置如豫省歸陳及江南徐宿一帶需兵助剿卽著僧格林沁等派兵前往與毛昶熙關保傅振邦等軍會合進剿以期力埽賊氛將此由六百里各諭令知之○賞密雲古北口熱河喀喇河屯張三營額魯特駐防存營兵丁暨駐紮古北口之西安黑龍江等處兵丁並看守各行宮弁兵等銀○賞京師

外城練勇每月口糧銀三千兩○戊戌諭內閣御史高廷祐奏請將浙江團練歸併巡撫辦理以專責成一摺前因邵燦督辦浙江團練未能妥協諭令王有齡酌保在籍公正大員接辦茲據該御史奏稱請照陝甘四川章程責成巡撫督辦等語所有浙江團練事宜卽著王有齡督同該省紳士認真經理以收實效其在籍大員卽著毋庸保奏○諭瑞昌王有齡奏逆匪撲犯省城迎剿獲勝一摺逆匪竄陷富陽縣城經瑞昌等派兵乘夜往攻賊匪驚遁復與臨安股匪合陷餘杭縣城徑撲省垣瑞昌等親自督戰副都統傑純與副將吳再升等均手刃執旗賊目數名賊勢退卻十月十四日賊分三股來撲復經副將文瑞派隊迎敵西湖水勇及文瑞等岸迎剿賊匪敗走剿辦尙屬認真著瑞昌等卽督飭將士迅將此股逆匪殲除毋任分竄○官文胡林翼奏查桐城爲安慶

咽喉背倚大山前臨重河地勢散漫溝渠極多馬步各軍施展較難逆首陳玉城復於城外修築石壘以抗我師副都統多隆阿率軍進逼城西派馬隊往東門呂亭驛一帶斷其接濟一面督率各營晝夜環攻七月十七至二十五等日轟破賊壘數處斃賊無算二十六日多隆阿派撥各營以正兵攻壘以奇兵策應該逆礮子如雨我軍愈進愈勇毀其木城數道直抵濠邊架木而進逆眾披靡我兵乘勝撲壘該逆拌死抗拒我軍前者傷亡後者繼進參將許應城等首先登壘身墜殞命副將雷正綰指揮該哨勇丁奮勇前進守備王允昌被礮子穿入右目屹立不退參將趙旣發等督隊繼進愈戰愈力便民門突出悍賊千餘擁擁來援經參將王可陞等分路馳擊殺賊數十名援賊敗退入城其時西門南門大股賊援亦被西面各營擊退登壘各軍見城賊已敗一呼齊進該逆

不能抗拒奪門狂走我兵四面截殺殲除淨盡其下面水壘牆峻濠寬多隆阿因兵勇傷亡過多擬卽收隊副將雷正綰等謂乘此銳氣卽可一鼓踏平復整齊隊伍層層疊進施放連環槍礮火箭噴筒同時射入該逆失措我軍拔毀木城一擁而入渡濠登牆該逆度不能支紛紛投水各營圍而蹙之剿殺無遺是日統計殺賊一千餘人多隆阿查看桐城之西北隅可開地道八月十三日派精選等八營列隊城根動工開挖城逆由北門突出撲營經遊擊銜楊得武率隊擊退乃該逆於城上環施大礮楊得武與把總李良德等同時中礮陣亡官軍因卽撤隊旬餘以來偵知陳逆率眾數萬將援桐城我軍戰守機宜倍加慎重已飭各軍嚴密戒備相機剿辦所有陣亡員弁從征數載屢立戰功此次奮勇捐軀深堪憫惜合無仰懇 天恩俯准將已革總兵銜升用副將續保遊擊

銜楊得武開復原官照總兵銜例參將銜遊擊許應城照參將銜
例遊擊張明山照遊擊例守備胡世明照守備例千總楊開興照
千總例把總湯炳照張岩喜汪若根李良德周正祥均照把總例
儘先外委秦均彥譚有德張順榜石珍玉馮光華軍功陳占先鄧
忠友王洪勝鄧起發余得永陳得金伍富貴何敬吉均照外委例
一併飭部從優議卹以慰忠魂其餘陣亡受傷弁勇查明分別辦
理 上諭官軍圍攻桐城疊次獲勝殺賊一千餘名勦辦甚屬認
眞所有陣亡之已革總兵銜記名副將續保遊擊銜楊得武等均
著照所請一併從優議卹○諭軍機大臣等崇實奏官軍鄉圍擊
匪獲勝一摺藍逆大股由丹稜竄至近省官軍雖屢獲勝仗地方
已被蹂躪李逆由五里浩竄至許家灣經官軍攻破營壘而逆黨
尙在內江隆昌富順等處奔竄加以土匪到處響應若不迅將逆

燄撲滅必致裹脅日多見在湖南綏甯城步等處被賊竄擾軍情
喫緊業已諭令駱秉章暫緩入蜀崇實身任巖疆責無旁貸著卽
督飭郭相忠蔣玉龍統帶官兵會合鄉團覘賊所向認真圍剿務
將藍李兩股逆匪悉數殲除毋畱餘孽將此由六百里諭令知之
○予浙江陣亡總兵官劉季三等四川陣亡知縣何汝源等祭葬
世職○庚子曾國藩毓科奏據總兵胡中和等稟稱前按察使蕭
啟江自咸豐三年奮袂從戎隨李續賓攻擊郴州岳州武昌田家
鎮等處賊匪所向有功五年江右寇熾竄犯湖南蕭啟江募帶湘
勇攻復茶陵州進援江右克復萬載縣六年十一月克復袁州府
城分宜縣城十二月克復上高縣城七年二月大破賊於瑞州之
陰岡嶺進圍臨江八月破石達開於大坪十二月克復臨江府城
八年三月克復崇仁縣城四月克復撫州府城九年二月克復南

安府城解信豐縣城之圍八月追剿石達開收復東安興安靈川
三縣破賊於大溶九月解桂林省城之圍數年來身經百戰馳驅
四省所至克捷本年帶勇入川盡瘁以歿請賜諡建祠等語查蕭
啟江性情果毅平日粥粥若無能及其臨敵決策英鷲無前年來
江西失陷九府蕭啟江一人獨克四府厥功最偉上年援湘援粵
援蜀一歲之內奔走萬里積勞身故實堪憫惻仰懇 天恩賜諡
並於湖南江西省城及湘鄉原籍建立專祠以表忠盡出自逾格
鴻施 上諭內閣前因布政使銜記名按察使蕭啟江在四川軍
營病故當經降旨追贈巡撫銜從優議卹茲據曾國藩毓科奏稱
蕭啟江身經百戰馳驅四省所至克捷本年帶勇入川盡瘁以歿
懇請賜諡並請於湖南等處建立專祠蕭啟江自咸豐三年帶勇
打仗克復江西袁州臨江撫州南安四府並援剿湖南廣西四川

等省戰功懋著洵屬忠勇可嘉著加恩賜諡並於湖南江西省城及湘鄉縣原籍建立專祠以示朕篤念忠盡至意○曾國藩奏官軍進攻休甯縣城鮑超移營西館張運蘭移營迪祥湖距休城皆十餘里十月初四日賊眾撲迪祥湖營盤張運蘭派隊出擊陣斬僞將軍汪懷忠及衝鋒賊百餘名編修宋夢蘭帶勇協剿亦多斬獲徽州援賊麴聚萬安街與城賊相犄角鮑超張運蘭會齊於十五日出其不意夾擊破之追十餘里殺賊二千有奇適僞侍王李侍賢因休甯被圍由嚴州進至徽州解運子藥大礮進城各營乘勝攻之北門出賊數千張運蘭揮兵直前鮑超督馬步包鈔殺賊千餘復圍攻東門賊營賊棄壘逃竄立毀賊壘二座僞忠王帶二萬人突由羊棧嶺竄入圖解休甯之圍斷鮑張兩軍糧路遊擊趙廷貴受傷夥嶺各防皆潰賊遂由盧村闖入夥縣張運蘭分兵迎

勦小挫鮑超帶兵趕至迎頭痛擊斃賊千餘立將黟縣城池克復
賊仍退踞盧村二十一日鮑超添派兩營張運蘭添派各旗進剿
賊由盧村出隊距戰我軍十盪十決賊眾大潰狂奔出嶺生擒三
百餘名斃賊約四千餘人都司楊雲貴守備鄭德亮射中僞檢點
艾逆把總羅紫亭刺死僞丞相吳桂先訊據賊供李秀城亦受傷
而遁查僞侍王李侍賢由嚴州回徽僞輔王楊輔青盤踞旌德環
徽郡二百里羣賊極多而僞忠王復由蘇常上援竟欲攻破黟縣
直犯祁門窺伺江西我軍急馳百餘里兩日之間連獲大捷驅出
嶺外實足以寒賊膽 上諭曾國藩奏官軍進攻休甯疊獲勝仗
並克復黟縣城池勦辦甚屬得手在事出力員弁兵勇著曾國藩
擇尤保奏候朕施恩○辛丑諭軍機大臣等前因慶廉賈臻互相
參奏降旨將慶廉撤任以嚴樹森補授河南巡撫並令將慶廉等

互參各款秉公查辦本日據慶廉奏賈臻剛愎性成遇事擅改舊章以致上忙錢糧徵解喫緊之際羣相裹足於應解京餉協餉均不能酌度緩急候補知縣張紹英係該員至戚例應回避輒蒙混委署並將該員請補鄆陵前任宜陽縣知縣河上同知周注例不准充幕友該員先令告病旋請充當錢穀狼狽爲奸其由歸德折回兵勇應領口糧指延不發裁撤各勇口糧亦應找發該員意存膜視復藉病推諉不顧大局各等語藩司爲錢糧總匯之區各屬升遷調補亦係藩司專責若如慶廉所奏賈臻於應解各餉不知緩急應行回避之員並不據實聲明且與幕友相與爲奸於兵勇應發口糧有心延指如果屬實殊出情理之外著嚴樹森於行抵河南後將所參各情並該撫前次互參各款一併嚴密訪查據實具奏不准稍有徇隱原摺片均著鈔給閱看將此由五百里諭令

知之○諭本日據慶廉奏藩司膜視軍餉等語據稱歸德大營糧餉自毛昶熙接辦以來均經藩司賈臻按月撥發並不欠解分文獨慶廉所帶兵勇口糧司庫指延不發慶廉業經撤任毛昶熙接辦軍務所有該前撫北援之兵勇及已經裁撤之勇所欠口糧如果應行支領卽查明參奏並飭令藩司邊浴禮分別發給毋任缺乏致有潰散將此由五百里諭令知之○諭揚防事務處處均關緊要據都興阿奏統籌全局大概情形所有水陸一切防剿事宜尙屬周妥著卽挑練兵勇悉成勁旅力保完善之區以期漸復糜爛之地李若珠業經開缺並著該將軍體察情形如果幫辦需人卽於軍營提鎮大員中擇其謀勇兼全威望素著之員酌量保奏候朕簡放將此由六百里諭令知之○允福建陸路提督李若珠解任養親○壬寅諭內閣直隸天津府知府石贊清在任年久深

得民心此次綏輯地方尙能妥協著加恩交軍機處記名遇有直隸道員缺出請旨簡放○諭戶部奏請將欠解京餉等項之督撫藩司監督分別議處一摺山西等省欠解京餉銀兩直隸等省欠解另案銀兩各該督撫藩司監督等延不報解實屬玩泄山西巡撫英桂布政使常績山東巡撫文煜布政使清盛前任河南巡撫慶廉前任布政使賈臻四川布政使祥奎均著降爲三品頂帶仍交部議處署四川總督崇實山西署布政使瑞昌山東署布政使陳景亮暨江海關監督均著交部分別議處仍著該督撫藩司監督等將未解京餉於接到部文之日起限一月內埽數報解若能迅速報解卽由該部題奏候朕施恩至各該省欠解另案銀兩並著一併趕緊籌解儻敢仍前玩誤卽著該部指名嚴參○僧格林沁奏臣於十一月初六日行抵濟甯因沿途車輛不齊官兵多係

徒行不能迅速見擬駐紮濟甯製辦軍火攻具俟後路官兵到齊再行前進臣抵濟甯後查得九月間擒匪竄近州城經知州盧朝安豫於城外備築圍牆一道挑挖濠塹二道引水環繞以資保衛復督帶練勇會營出城迎截隨即擊退其汶上縣被圍亦經地方官督帶兵團擊回至豫皖擒匪情形詢據南省撤回官兵聲稱逆首張落刑龔瞎子孫葵心等各聚匪黨無數此外大小頭目聚集人數亦復不少每年數次出巢打糧總向無兵處所焚搶迫官兵往剿業經飽掠而歸每至一村搶擄資財糧米村舍燒爲赤地殺害老弱裹脅少壯其不甘心相從者亦屬無家可歸以此出巢一次卽增添人數無算此擒匪眾多之情形也擒匪巢穴官兵難以進攻該逆並將巢穴四面一二百里外村莊焚燒無存井亦填塞官兵裹糧帶水何能與之久持一經撤退該逆緊躡其後往往因

此失利此各路官兵僅能堵禦不能進攻之情形也賊匪每次出巢馬步數十萬列隊百餘里兵少賊多眾寡懸殊是以任其猖獗無可如何前此粵捻各樹旗幟並未合夥近年彼此相通聯爲一氣官兵在北粵匪在南捻匪居中以爲粵匪屏蔽若厚集兵力分投進剿捻匪一經受創粵匪自必蠢動非竭力相助卽另圖北犯以分我之兵勢此剿辦捻匪不易之情形也查臣原帶馬步官兵六千餘名續由勝保調撥陝甘官兵四千名山東巡撫調撥綠營官兵二千名青州旗營官兵五百名覈計馬步官兵共一萬二千餘名擬俟各路官兵到齊軍火攻具辦妥卽行督兵南下會合傅振邦德榜額二軍相機進剿儘能得手卽當直擣老巢蕩平醜類臣前於獻縣途次遇由南撤回傷病吉林官兵一百二十餘員名逐一查驗病愈尙堪從征者八十員名仍令委營總富和管帶隨

同前進此項官兵並無馬匹器械應由軍營撥給其傷病未愈者
仍令撤回又行至阜城縣據直隸昌平營遊擊王祥稟稱該員帶
領直隸官兵一千二百餘名由傅振邦飭令帶赴勝保軍營查此
項官兵自可無須北上臣已飭令該官兵仍即折回傅振邦軍營
聽候調遣瑞麟已於十一月初三日督帶後路官兵自河間起程
南下得旨見在捻匪意圖北犯實在意中儻汝軍深入捻巢漸次
掃除亦非一載即可成功若曠日持久致該逆偵知我無後勁繞
路北竄彼時汝軍反爲賊所隔欲回無路可繞即使能繞出賊前
亦恐將爲強弩之末豈不有關天下全局見在反復熟思汝仍應
遵前旨坐鎮山東以杜其窺伺之心斷難輕於一試致誤全局○
以辦理各國和約出力賞武備院卿恆祺頭品頂帶候補京堂崇
厚侍郎銜復侍郎崇綸職並下部議敘○予山東陣亡知縣何允

安祭葬世職○命山東巡撫文煜迅解銀十萬兩直隸布政使文謙迅解銀十七萬兩赴欽差大臣僧格林沁軍營○癸卯瑞昌王有齡奏十月十五日逆匪由秦亭山古蕩觀音橋三路進撲傑純吳再升等分投迎擊槍礮環施鏖戰六時之久該逆愈聚愈多署藩司麟趾親帶小隊往來策應殲賊甚多臣等復飭文瑞由寶樹塔鈔襲將賊隊衝爲兩截又令水軍繞至秦亭山後縱火該逆仍死拒不退傑純揮戈陷陣立斬黃衣賊目二名賊勢稍卻吳再升等身先士卒縱馬衝入賊隊左右馳突賊勢披靡屍骸滿地文瑞居中截殺斃賊無算該逆首尾不能相顧倉皇奔竄官軍追至畱下地方賊眾棄營遠遁臣等恐該逆退踞餘杭終爲心腹之患飭吳再升等乘勝攻剿旋據奏報十六日官軍直逼餘杭該逆不敢抵禦由西北二門逃竄我軍跟蹤追擊沿途斬殺及中槍礮死者

不計其數當將縣城收復查此次大股圍撲省垣危險萬分幸蒙
聖主威福文武和衷將士用命血戰三晝夜竟能以少克眾城
圍立解又乘勝逐北收復餘杭縣城初非意料所及除饒廷選係
提督大員不敢擅擬獎敘外所有尤爲出力之署杭州副都統傑
純等自應奏懇恩施以昭激勸其餘出力文武員弁容查明擇尤
請獎 上諭內閣此次逆賊大股竄撲杭州兇熾甚熾經瑞昌等
調兵剿辦以少勝眾力解城圍並克復餘杭縣城實屬調度有方
杭州將軍瑞昌著加恩賞給一等輕車都尉世職浙江巡撫王有
齡著加恩賞給頭品頂帶浙江提督饒廷選著交部從優議敘在
事尤爲出力之署杭州副都統甯夏副都統傑純著賞給額騰依
巴圖魯名號杭嘉湖道麟趾著賞給續勇巴圖魯名號其餘出力
文武員弁著瑞昌王有齡查明保奏○諭瑞昌王有齡奏官軍攻

復嚴州府城一摺賊匪竄踞浙江嚴州糾約死黨意圖鈔襲我軍後路經張玉良督率將士連戰三晝夜並派參將韓廷貴等分攻各門守備陳永椿等復帶礮船對岸轟擊李定太奮勇先登官兵踊躍而上施放噴筒火箭該逆驚惶逃竄我軍乘勝追剿斃賊千餘名斬首百餘級奪獲旗幟器械無算於十月初八日將嚴州府城克復剿辦尙屬認真在事出力之文武員弁兵勇准其擇尤保奏候朕施恩○以克復浙江壽昌縣城擢知府程兆綸以道員用賞花翎○以克復浙江嚴州府城復已革提督張玉良頂帶賞已革總兵官李定太三品頂帶餘升敘有差○賞古北口外防兵皮襖○丁未諭內閣惇親王奕誼之第八子著命名載灝○諭本年直隸天津縣被擾地方業經降旨將節年地糧旗租分別蠲豁因思順天府之大興宛平通州武清等州縣亦有被擾地方小民蕩

析離居朕心實深憫惻著順天府府尹直隸總督飭屬確查分別
被擾輕重奏請蠲緩糧租以紓民困○予江西陣亡敎諭邵廷選
等祭葬世職○戊申諭軍機大臣等前因俄國續約內載東西兩
邊設立界牌應由兩國派出信任大員秉公查勘東界在烏蘇里
河口會齊於咸豐十一年三月內辦理西界在塔爾巴哈台會齊
商辦不必限定日期等情東界會勘已明降諭旨令倉場侍郎成
琦前往會同吉林將軍景淳辦理所有西界會勘大員著景廉於
就近各城大臣中擇其熟習情形通達事體者酌擬數員開列清
單候旨簡派卽由伊犁發給地圖前往塔爾巴哈台會同俄國使
臣公同查勘將此諭令知之○命倉場侍郎成琦馳往吉林會同
將軍景淳查勘俄國分界事宜○追予河南陣亡知府王榮烈等
建祠○己酉諭內閣瑞昌王有齡奏賊撲湖州府城兵團堵剿獲

勝一摺十月間賊匪撲犯湖州府城道員趙景賢派團勇會合知府瑞春等登城守禦都司吳業祥等水師及千總李楚材所帶陸路各軍將金蓋山等處賊匪擊敗該逆復糾約平望大股七八萬人竄至郭西灣等處趙景賢派水路各勇會集民團分投堵剿以守爲戰復於黑夜暗襲康山等處賊營破賊卡十餘座東路平望之賊撲擾大廟港等處復經各營勇丁及民團前往救援賊盡敗回此次該道以寡敵眾屢挫兇鋒實屬調度有方趙景賢著加恩交軍機處記名遇有道員缺出請旨簡放以示鼓勵並仍飭該道聯絡民團實力進剿務期淨絕根株毋畱餘孽○諭瑞昌王有齡奏帶兵武員通賊等語廣東南雄協都司劉仁福遊擊劉仁祿以武職大員膽敢勾通逆賊謀踞湖州實屬罪大惡極見經該處兵勇擊殺洵足快人心而彰國法所有在事出力官紳著瑞昌王有

齡查明擇尤保奏○諭軍機大臣等瑞昌等奏探聞江西股匪由
河口鎮分竄興安鉛山又徽甯賊匪下竄將近威坪等語浙省杭
嚴兩郡甫得肅清湖州正在喫緊江皖兩省股匪復行窺伺實屬
面面受敵兵力難於兼顧總兵曾玉明一軍見駐衢州所有江常
一路卽責成督兵迎勦力遏兇鋒其由閩調浙兵勇二千餘名見
尙未到著慶端瑞璜催令星夜前進毋稍遲延此項官兵到衢後
統歸曾玉明管帶以厚兵力徽甯之賊竄近威坪並飭令該總兵
與張玉良之軍互相聯絡嚴密堵勦毋任賊匪闖入是爲至要將
此由六百里諭令知之○庚戌諭內閣前據吏部奏請舉行京察
當經諭令各部院衙門本年京察有劾無薦覈實辦理嗣據吏部
奏請仍飭在京各衙門秉公保舉不必拘符定額復諭令此次列
薦章者不得逾額之半並將京師戒嚴期內在署辦事並曾否遷

移各員分別開單具奏惟思京察爲三載考績大典各部院堂官
考覈司員必察其平素勤惰始能分別舉劾若其人向來辦事認
眞而數日未能到署遽行甄劾似覺可惜或本非出色之員僅於
戒嚴期內照常到署遂登薦牘亦不足以昭平允所有在京大小
官員應行辛酉年京察著展緩一年照例辦理其 陵寢衙門及
盛京等處仍著照舊舉行並著各該堂官畱心查覈如有貽誤公
事之員隨時參劾毋許瞻徇以副朕激敘官方至意○諭軍機大
臣等瑞麟奏剿匪情形並懇恩賞假調理一摺據稱本月十二日
行抵濟甯探得魚臺一帶有大批擒匪遂與僧格林沁由嘉祥鉅
野統兵進剿十五日於楊山集地方擒斬擒匪數十名其時僧格
林沁已往東攻剿訪知大隊被賊匪壓下卽同格綳額等帶隊迎
擊因賊來愈多退至濟甯並墜馬受傷請假調理等語僧格林沁

由楊山集進剿擒匪僅據瑞麟奏被匪壓下究竟如何失利見在駐兵何處及一切布置情形著僧格林沁詳細馳奏以慰廬念擒匪大股竄擾該大臣專帶馬隊二千迎剿以致輕進失利恐賊勢益張乘虛北竄該大臣等務當督率將士繞出賊前迎頭截擊毋令分竄儻該逆被擊回巢該大臣仍當遵照前旨在濟甯兗州一帶擇要駐紮先將北路妥爲布置再行相機前進趙康侯練勇及陝甘官兵據瑞麟奏稱業已調往接應本日並據文煜奏稱總兵富新一軍已令前往魚臺均著僧格林沁催提前進此外如有可調兵勇並著該大臣酌量調撥以厚兵力瑞麟著賞假數日在營調理一俟稍愈卽與僧格林沁將防剿事宜會商妥辦將此由六百里諭令知之○諭文煜奏逆擒意圖回竄總兵富新一軍見已調往魚臺毋庸專駐曲阜等語擒逆回竄東境僧格林沁進剿失

利匪勢極爲猖獗所有富新一軍業經文煜調往魚臺著卽催令
星馳前進探明匪蹤實力迎擊此外如有可調兵勇並著該撫酌
量調派分投堵剿毋令匪眾得以深入其曲阜地方仍著督飭地
方文武嚴拏土匪以重 林廟將此由六百里諭令知之○辛亥
諭內閣此次辦理巡防除文祥崇綸業經加恩外瑞常慶英麟魁
均著加恩交部議敘寶鋆當喫緊之際尙在任事著加恩賞還二
品頂帶見在京師人心安靖著卽撤巡防處仍歸步軍統領認真
辦理○僧格林沁西凌阿奏據淮徐道稟報擒匪五旗並出人數
甚眾距郡城數十里意圖窺伺等情瑞麟已於十一月十二日馳
赴濟甯臣等正擬督兵前往徐州復據魚臺等縣飛報擒匪竄入
境內請兵救援臣等卽酌帶馬步官兵由嘉祥馳抵鉅野探聞賊
匪在鉅野東南六十餘里之羊山盤踞旋向西南奔竄臣等於本

月十五日帶馬隊前往跟追行至距羊山十餘里之金山地方該逆結隊而出約計馬賊萬餘人步賊三萬餘人分路抗拒臣僧格林沁西凌阿率同國瑞帶馬隊五百餘名抵敵東南瑞麟格綳額帶馬隊五百餘名抵敵西南槍箭齊施斃賊無數該逆愈集愈眾圍裹數重相持兩時眾寡不敵臣等帶領官兵衝出重圍適瑞禧已帶步隊馳抵距金山二十里之獨山地方臣等亦帶領馬隊退至獨山紮營十六日該逆全數來撲環繞馬步各營我兵開礮轟擊殪賊多名該逆紛紛向西南竄逸臣等因馬隊兵力過單不能跟蹤追剿查此次斃賊雖多而官兵陣亡亦復不少頭品頂戴副都統格綳額並伊子卽補防禦忠倫侍衛德成同時陣亡三等侍衛遐昌在賊圍中戰馬蹉跌致無下落該員等忠義奮發臨陣捐軀而格綳額父子陣亡尤堪憫惻均懇 天恩交部從優議卹其

餘傷亡官兵容候查明再行分別辦理瑞麟督隊乘馬滑倒致將
腰骨跌傷見在汶上縣趕緊醫治臣僧格林沁於十七日回駐濟
甯以扼運河北岸並行知河南巡撫札飭大名鎮道於黃河北岸
加意嚴防惟臣等所帶馬隊實屬不敷攻剿擬將駐紮古北口之
黑龍江官兵一千名前調之哲里木盟官兵五百名及請旨飭催
之昭烏達盟官兵八百名一併催調來東助剿臣僧格林沁一面
行文察哈爾都統在商都馬羣內挑馬一千匹分五起解送來營
以資乘騎並行文巡捕營調取都司一員守備一員千總把總各
四員星夜來營聽候差委上諭軍機大臣等捻逆竄擾東境雖
經官兵轟斃多名而我軍亦有傷亡尙恐該匪恃眾回竄僧格林
沁見駐濟甯兵力尙單未可輕率前進致有挫失著就見有兵力
會合東省兵勇將北路各要隘嚴密布置毋任匪蹤闖入一俟兵

力厚集再行相機前進將此由六百里諭令知之○袁甲三奏自
擒匪竊發以來近更延蔓疊潰東省之防漸有北窺之志此歸彼
出竄突幾無虛日今 皇上時簡僧格林沁督兵南下將見提綱
挈領次第廓清是軍務一大轉機臣謹就見在兵力賊情通籌全
局爲我 皇上瀝陳之淮南州縣多被粵逆竄踞所以未獲與擒
逆合夥北竄者長淮爲之限也臣前於鳳壽解圍後與臣翁同書
計議扼定長淮以守爲戰上自三河尖下至高寶湖分設水軍往
來策應而擒首孫葵心前由汝甯竄擾光固旋由固始南趨與盧
定賊匪會合欲解安慶桐城之圍幸楚師有備未獲逞其狡獪見
該逆首麇聚六廬之間其句結北竄事在意中長淮千餘里要隘
甚多防範均應嚴密若銳意南征卽規復一二城池而無重兵以
守之仍恐旋得旋失且擒蹤在後萬不能無回顧之憂此淮南守

急於戰之實在情形也徐宿一軍本不滿萬近因餉需支絀裁汰甚多苗練撤退亦復不能相顧防剿均難著手傅振邦憂慮成疾能否及時全愈尙未可知幫辦之總兵田在田威望尙輕閱歷亦淺難以獨當一面山東河南之兵止能扼守本疆不能越境會剿且從前捻匪專以野戰爲能近則築圩屯踞賊壘林立官軍以全力圍攻累月經旬未能破其一寨卽此破彼築亦屬徒煩兵力況與東豫境地毗連路路可通見在北竄之賊雖暫時回巢而附巢無可擄掠必致旋歸旋出東豫兩境皆成熟路加以畿輔以南到處伏莽萬一有聞風繼起者人心騷動大爲可虞至苗沛霖勇練本屬良莠不齊前次所撫河北各圩近日多懷觀望尤不可不加意防維此淮北戰守並急而又兩難措手之實在情形也爲今之計惟有先清北路然後併力南征尤須聯絡聲威撫綏團練合東

豫徐宿諸軍統歸僧格林沁節制臣一面扼守長淮一面分撥兵

勇先與僧格林沁之軍會合夾攻儻能得三五次勝仗賊餒漸衰人心自定即可相機收撫以次蕩平東豫江皖之間民氣得資休息然後鼓行而南粵逆不難掃除矣惟僧格林沁見抵何處尙未接奉明文業經切實函商東豫兩省如何布置統容隨時妥籌相機辦理上諭袁甲三奏稱先清北路然後併力南征並將東豫徐宿諸軍統歸僧格林沁節制調度均能切中時勢惟僧格林沁所部兵勇不及萬人兵力既未厚集器械尙待修整此時止可暫駐濟甯力杜北竄俟各路官軍到齊後方可節節前進先將捻匪悉數掃除然後會合各軍併力南下以期一鼓蕩平該大臣務宜力保清淮扼守中路關鍵仍與僧格林沁等隨時函商統籌全局是爲至要將此由六百里諭令知之○賞已革副都統伊興額三

品頂帶辦理徐宿民團事宜○以提督李世忠捐餉加河南鄉試中額三名並永廣光州固始學額各四名○于山東陣亡副都統格綳額等祭葬世職○調駐紮古北口之黑龍江西安馬隊各五百名並哲里木盟官兵五百名昭烏達盟官兵八百名馳赴山東交欽差大臣僧格林沁調遣○調兗駐熱河之盛京官兵五百名赴古北口交直隸總督恆福調遣○壬子諭軍機大臣等勝保奏請訓練京兵以備緩急一招京營兵丁向例按期操演多屬奉行故事該大臣請將內外火器營健銳營及圓明園八旗官兵專派知兵大員加以訓練以期悉成勁旅自係當務之急惟是否變通舊章抑須另籌經費均應悉心妥議若徒飾外觀虛糜糧餉轉恐有名無實著勝保將練兵章程先行詳細妥議迅速具奏再降諭旨至將來訓練時各營開支錢糧及升補額缺等事自應仍由各

該管大臣辦理將此由五百里諭令知之○陝甘總督樂斌等奏
遵籌西巡事宜得旨西巡之舉不過姑存其說建極馭外究不若
燕京豫籌各項不必行單臨畱中又奏會商調兵由撫臣帶赴漢
中布置批漢中設防專爲豫杜蜀匪蔓延若川軍得手陝防稍鬆
仍應酌撤歸伍以息兵力○給事中林之望奏請飭步軍統領瑞
常會同勝保嚴拏土匪得旨勝保帶兵原有彈壓土匪之責況半
係外兵斷難與京營兵共事所請毋庸議○癸丑諭軍機大臣等
前因江陰縣城克復諭令巴棟阿由鎮防撥兵一千五百名李若
珠由江北大營撥兵一千五百名派赴江陰會同防守本日據都
興阿奏天長之賊時謀東竄三河蔣壩衡陽仍形喫重徐宿捻匪
出巢屯踞夾溝楊村地方欲竄清淮儀徵之賊亦未遠退劉成元
一軍萬難調往且探聞江陰又有賊蹤揚州腹背受敵處處均須

堵禦更無兵勇可抽鎮江派赴江陰常昭等處官兵行至仙女鎮無舟南下迄今尚未啟程等語江陰甫遭蹂躪見旣又有賊蹤亟須厚集兵力以資防守劉成元一軍旣不能調往著巴棟阿馮子材將派赴江陰之官兵一千五百名催令迅速到防其派往常昭官兵並著一併嚴催前進毋再遲延嗣後如有續調官兵卽飭徑由南路江面就近雇舟前往勿再繞道江北以速軍行將此由六百里諭令知之○命陝西在籍五品京堂聶灃等分辦本籍團練事宜○甲寅官文胡林翼奏逆首陳玉城糾集定遠六安股匪各率悍黨號稱十數萬自舒城廬江上竄十月初旬竄至桐城縣屬西南之挂車河望鶴墩香鋪街棠梨山等處築壘四十餘座圖解安慶之圍副都統多隆阿列營於挂車河西嚴陣以待十四日逆賊傾巢出隊列於河東以誘我師多隆阿令各營列陣觀其動靜

該逆分數千人踰河來撲參將趙旣發等併力迎擊鏖戰數時賊力不支紛紛敗退其殺賊三百餘人賊鋒少挫二十三日陳逆復於望鶴墩增築營壘多隆阿派親兵由中路進派左右隊分路出擊該逆分路抗拒我軍奮勇直前賊亦愈戰愈眾多隆阿復調溫德勒克西等飛騎撲擊自率吉林官軍從中衝出槍箭齊施該逆奔潰入壘共殺賊千餘人二十八日多隆阿與李續宜約以一軍從挂車河一軍從新安渡上下夾攻分爲七路部署既定李續宜一軍前進賊眾傾巢而出併力死拒官軍大呼陷陣外委王品祥劉楚泰等首先衝入登時陣亡遊擊朱吉玉繼進礮傷左手將士等積憤生勇銳不可當盡破棠梨山等處賊壘逼近香鋪街適多隆阿馬步各軍由望鶴墩之右抵香鋪街與賊接仗橫衝直擊殺賊殆盡遂與李續宜會合裹賊於中正酣戰間雷正綰率左路七

營至廖岡溫德勒克西所部馬隊至范岡均由後路鈔出諸路並進槍箭齊施呼聲動天地圍殺三時之久賊屍枕藉流血成渠其逃出之賊分路奔竄追殺二十餘里是役也共殺賊八九千名溺水死者又二三千名生擒長髮老賊一千三百餘名解散脅從一萬三四千名攻破賊館百餘處踏毀賊壘四十餘座是夜賊卽全數棄壘逃走多隆阿親督馬步躡尾追剿殺賊又四百餘名與李續宜皆率所部直至桐城該逆踞城不出官軍收隊回營見據探報陳逆等皆逃竄廬江從此懷桐城內之賊援絕勢孤不久卽當殲滅臣等查陳逆四眼狗以逆眷困於安郡圖解重圍輒糾合股匪十餘萬眾築壘四十餘座併力上犯勢極兇狡仰仗聖主威德將士齊心用命以少克眾實於東征全局所關甚大多隆阿李續宜和衷共濟聯數萬士卒爲一心謀定後動出奇制勝旬日之

內殲除大股援逆厥功甚偉應如何獎勵之處出自 天恩其餘
在事出力人員可否由 臣等查明擇尤保獎出自逾格 鴻慈

上諭內閣官文胡林翼奏楚軍大勝一摺逆首陳玉城句結捻首
龔瞎子孫葵心各率悍黨上竄桐城縣之挂車河等處經副都統
多隆阿安徽按察使李續宜兩路夾攻出奇制勝實屬調度有方
多隆阿著賞穿黃馬褂李續宜著賞加二品頂帶其餘在事出力
人員准其擇尤保奏候朕施恩○諭邵燦等奏兵團疊次獲勝一
摺逆匪攻破富陽後分股下竄圖犯甯紹均經防勇民團併力擊
退復在富陽一帶江面偷搭浮橋窺伺諸暨兵勇出其不意立將
浮橋燒毀擊沈賊船無數上江一帶見已肅清甯紹兩府如常安
堵浙省團練防剿尙屬認真並能收復壽昌富陽等縣所有在事
出力紳民著王有齡會同王履謙查明保奏○諭軍機大臣等前

據恭親王奕訢等奏接見俄酋面稱髮逆橫行願撥兵助剿及明年南漕運京或有阻礙上海米商粵商情願領運臺米洋米運津二事當諭曾國藩薛煥袁甲三等公同悉心妥議具奏嗣據袁甲三薛煥先後覆奏所陳均各有所見本日曾國藩奏稱金陵髮逆之橫行皖吳官軍之單薄均在陸而不在水此時陸軍不能遽達金陵卽令俄船由海口進駛亦未能收夾擊之效應請傳諭獎其效順之忱緩其會師之期俟陸軍克復皖浙蘇常各郡後再由統兵大臣約會派船助剿庶在我足以自立在彼亦樂與有成惟當先與約定兵船經費若干一一說明將來助剿時均由上海糧臺支應以免爭釁與薛煥所奏大同小異惟所需兵費是否先期約定著恭親王奕訢悉心體察酌議具奏其請幫運南漕一節據曾國藩請飭薛煥在上海與之訂明粵商取保領價米商聽其自行

經理惟據薛煥所奏桂良等前在上海議定米穀等糧均不准運外國但准夷商從此口運至彼口仍完出口稅銀似可令其照辦運津官爲收買等語並著奕訢等詳細妥籌統俟議定章程再與該國會商辦理曾國藩袁甲三及薛煥摺片均著鈔給閱看○賞五城散放貧民棉衣銀○曾國藩奏近日軍情僞忠王李秀城自羊樓嶺擊敗後已入休甯縣城僞侍王李侍賢仍踞徽州僞輔王楊七麻子率黨攻撲建德連日鏖戰普承堯一軍敗挫建德失陷其另股賊匪自南贛竄出者擾陷德興婺源經官軍跟蹤追剿於十一月初一日克復德興初三日克復婺源賊中僞王四人除僞英王四眼狗見在桐城日夜大戰外其三人皆在徽境二百里內寶覺防不勝防剿不勝剿仰仗 皇上威福若皖南能再支持兩三月則皖北安慶有必克之理大局有必轉之機矣報聞○乙卯

論軍機大臣等文煜奏東省見辦錢漕情形一摺據稱平原東鄉刁民集眾攜械偏城放槍以籌團費爲名抗納漕米莘縣各里莊民傳單糾結鹽梟攜帶槍礮來城該縣帶役出城曉諭竟敢放槍抗拒以致互有殺傷館陶冠縣堂邑等縣亦分送傳單聚眾抗欠錢漕博興淄川平度等處俱有抗糧之案見在東省止登州未據報有抗糧情弊其餘九府二直隸州錢漕多半延抗等語各州縣中充當大小團長團總者人數既多賢愚不一難保無藉團生事抗拒錢糧之人若不及早辦理深恐釀成巨患著杜翻剴切曉諭各該處團長等毋得抗欠國課自干罪戾儻有刁民以籌團費爲名抗納錢漕甚至擁眾圍城恃強滋事者卽著該大臣督率練勇會同地方官將爲首各犯速行捕拏卽行正法不准稍有姑息以儆梗頑而戒效尤文煜摺鈔給閱看將此由六百里諭令知之○

諭文煜奏捻逆復擾鉅野縣城被圍飛報欽差大臣發兵援剿等語該撫於所屬縣城被賊圍攻並未將如何籌畫情形詳細聲敘豈以僧格林沁帶兵見在東省文煜遂可卸責若僧格林沁統兵南下該省軍務又將誰諉耶著文煜將見在如何派兵援剿一切布置情形迅速妥籌辦理毋得以一奏了事另摺奏平原莘縣等州縣藉團抗糧業經諭令杜翻曉諭各屬團總團長人等彈壓解散如有實在抗拒不遵者卽將首犯嚴拏懲辦鄉民藉團抗糧固屬事所必有地方官浮收勒折因而激成事端亦不能保其必無該撫身任封疆徵收漕糧係屬地方應辦事件亦豈能盡諉之督辦團練大臣仍著文煜嚴飭各該州縣妥爲辦理儻有不肖之員任意加耗以致人心不服卽著查明嚴參文煜自請議處並請將藩司議處文煜清盛於各餉不能如期應付著交部分別議處將

此由六百里諭令知之○丙辰諭內閣朕聞江蘇省本年被賊蹂躪最爲慘酷百姓流離顛沛戶口散亡賊復設立僞官追索錢米並多方誘脅稍有不遂陵虐橫施朕心實深憫惻屢飭統兵大臣等督率兵練奮力勦辦諒不難指日蕩平惟念陷賊州縣小民如在倒懸將來地方克復若將新舊錢糧照常徵收民力其何能給所有江蘇浙江安徽所屬被賊占踞各州縣應徵本年新賦及歷年實欠在民錢糧著一律豁免以蘇民困其被賊竄擾未經占踞地方並著各該督撫查明應徵應緩分別具奏至各處被賊裹脅良民屢經降旨准其自拔來歸見在江浙皖省賊陷州縣被脅人數更多著申明曉諭予以自新並著各路統兵大臣嚴飭所部員弁兵勇凡被脅良民毋許妄行殺戮該督撫卽刊刻謄黃於被賊蹂躪地方徧行曉諭用示朕軫念民依脅從罔治之至意○實授

胡林翼湖北巡撫○命署江蘇布政使吳煦幫辦團練事宜○丁巳諭軍機大臣等色克通額等奏俄國使臣至庫倫議及建房牧畜應按新約辦理一摺據稱由京回國俄羅斯使臣伊格那提業幅至庫倫會晤問及建蓋房間牧放牲畜處所經該大臣以公署西北左近不便與之雜處且與哲布尊丹巴呼圖克圖住館相偏亦屬非宜當經捐出公署東五六里許之杜木達鄂博地方可以建立房間公署東十五里許之烏里雅台河口可以牧放牲畜該使臣已派官看定伊格那提業幅卽行回國惟據聲稱將來俄國隨從人等均攜帶眷屬收存貨物必須多建房屋經色克通額商及建房三十餘間庶足敷用該使臣稱係領事官承辦等語俄國在庫倫設領事官自行建房續增條約內業經載明惟人數過多於地方不甚相宜著恭親王奕訢等行文俄羅斯國總理通商大

臣務令遵照條約辦理方爲妥善原摺著鈔給閱看○戊午以桑

春榮爲內閣學士

候補內閣學士

○己未賞移紮古北口盛京官兵五百

名皮衣○是月豁免江蘇浙江安徽被賊占踞各州縣新舊額賦

免直隸天津縣被擾村莊新舊額賦蠲緩直隸祁州等三十六州

縣被水村莊山東濟甯等七十三州縣被水被擾莊屯暨永利場

竈地租湖南武岡等五州縣被擾地方新舊額賦緩徵山西徐溝

縣被旱地方本年額賦暨榆次汾陽二縣原借倉穀

十二月庚申朔以晏端書爲左副都御史

由大理寺卿遷

○辛酉僧格林

沁奏查十一月十五日在羊山地方與賊接仗

臣

在東面督帶馬

隊迎剿瑞麟在西面督帶馬隊迎剿是日該逆大股來撲賊眾兵

單本屬難以得手而賊匪愈聚愈多不能不奪路而行瑞麟退至

數里之外忽然落馬惟落馬後退至鉅野縣原可駐紮接應各隊

乃瑞麟不在鉅野紮營復越過嘉祥濟甯退至汶上距賊二百餘里以致後路官兵渙散實屬怯懦無能相應請旨將侍郎銜瑞麟革去職銜飭令回旗以示懲戒查西凌阿帶兵多年膽識尙屬優長國瑞隨臣在營二年有餘經臣委爲營務翼長辦理軍務亦能認真合無仰懇 天恩飭派西凌阿國瑞作爲臣營幫辦藉資臂助 上諭內閣侍郎銜瑞麟督帶馬隊於羊山接仗落馬後節節退守實屬怯懦無能瑞麟著革去侍郎銜飭令回旗鑲藍旗蒙古都統西凌阿工部右侍郎國瑞均著幫辦僧格林沁軍務○僧格林沁奏擒匪自擊退後向西南竄至張古集地方臣因運河隄岸並無官兵防守卽飭副將文瑛等分紮運河隄岸仍傳諭各處鄉團嚴加防守探得該逆在鄆城縣一帶盤踞游奕往來奔竄自十一月二十日由趙王河隄岸南竄隨處搶糧至二十四日起竄至

曹州府迤東二十里之新集地方似恐官兵從後兜擊不敢遽行回竄臣恐該逆時思北竄官兵轉致落後剿辦更難著手擬將東省布置穩固再圖進剿查東省南界舊黃河見在雖已改道而舊有隄岸尙存本年春閒沿河之山東各州縣修築長圍一道橫互三百餘里其金鄉魚臺二縣自黃河隄岸至南洋湖邊接連修築九十餘里尙未竣工此項長圍爲山東全省屏障立法極爲妥善若工程堅固有人防守捻匪斷不能竄擾臣已札飭兗沂曹濟道王觀澄率同各該州縣傳集團總安議防守章程並派員前往周歷履勘務期一律堅實以資捍衛一俟辦理就緒臣卽移營前往擇要駐紮鄉團果能分段防守官兵隨處策應捻蹤卽不能闌入東境旣無後顧之憂再移營徐宿一帶節節進剿上諭軍機大臣等僧格林沁兵力尙單不敷進剿更恐該逆被剿情急北竄官

兵轉落賊後勦辦更難得手歸化城官兵五百名卽由該大臣咨調一俟各路官兵到齊先將東省布置穩固再行相機進剿不可遽行深入文煜前奏鉅野被圍見在情形若何該撫諒已派兵勦辦著該大臣隨時策應沿河各州縣修築長隄橫互三百餘里金鄉魚臺尙未竣工黃河隄岸雖可爲東省屏障必須防守得人捻匪始不能闖入著該大臣飭令各地方趕緊修築堅固鼓舞民團分段防守並令官兵互相聯絡以杜北犯將此由五百里諭令知之○予陣亡副將呂得科等湖南殉難知縣安和等祭葬世職○以疏防淀園被擾怡親王載垣等下部議處革散秩大臣恩齡任仍畱侯爵免治罪○癸亥諭軍機大臣等本日據巴棟阿奏酌調師船嚴防江面並英船入江通商必由下游而上見在下游各口防堵喫緊該處原泊師船雖多並無大員駕馭請飭黃彬帶船下

駛居中調度不獨使英國官商見我水寨軍容之盛卽南岸各處港口亦可杜賊北竄至金陵觀音門浦口九洑洲等處賊船較前更多鎮城孤懸南岸全仗江面通行萬一該匪併力下駛鎮郡恐難支持請飭李德麟帶領全幫礮船赴鎮巡防等語松江逆燄鴟張江陰復陷下游防堵喫緊著卽飭黃彬統帶師船下駛居中調度往來梭巡嚴密防守如見英船入江卽派安幹弁兵撥船護送至李德麟全幫礮船調赴鎮江能否兼顧北岸著都興阿酌度形勢妥籌辦理務令上下游聲勢聯絡兼顧南北兩岸毋得顧此失彼又據王夢齡奏鎮營軍餉向歸南臺供支見在北臺來源日絀用款日增若再將通州等五廳州縣畝捐改歸鎮營籌辦北臺餉需愈形竭蹶請將海門靖江畝捐撥歸鎮防並仍歸南臺勸辦等語巴棟阿前請分撥通海等五廳州縣畝捐之處業經降旨允准

惟江南糧臺尙有專撥月解之款江北糧臺支絀更甚通海各處
畝捐自未便悉歸江南糧臺所有海門一廳及原隸常州之靖江
一縣著改歸江南糧臺督同地方官籌辦其通州如皋泰興畝捐
著仍歸王夢齡與喬松年辦理以資接濟將此由六百里各諭令
知之○署漕運總督王夢齡奏邵伯鎮迤南漫口合龍報聞○甲
子諭內閣京師應放八旗及各營兵餉前經戶部奏定新章按月
支放實銀五成見在天氣嚴寒兵丁生計維艱所有本年十二月
內應行豫放明年正月分兵餉著加恩添放實銀二成以示體恤
自二月以後仍照新章辦理○乙丑諭軍機大臣等辭煥奏請飭
奕訢等發給英人李泰國札諭令其幫辦各口通商事務等語新
定通商稅則既有外國人幫辦稅務一條該英人李泰國係總司
稅務所有新設通商各口自可令其一體經理著奕訢等卽行發

給執照交李泰國收執責令幫同各口管理通商官員籌辦並著
恭親王等咨行通商各省將軍督撫府尹等一體查照其置買巡
船等件及辛工經費亦著一併咨飭各口與李泰國會議妥辦毋
任冒濫原片鈔給閱看將此由五百里諭令知之○江蘇巡撫薛
煥奏各國開辦新章上海稅釐兩礙情形得旨見在各省釐捐軍
食攸賴應如何嚴定稽覈章程著戶部議奏○以攻克江蘇松江
府城賞知府孫士達遊擊俞圭等花翎餘加銜升敘有差○丙寅
諭內閣徐之銘奏見飭回務掌教辦理撫回事宜等語雲南回務
掌教馬德新副掌教徐元吉武生馬如龍辦事公正素爲回人所
服既據稟請情願安撫回眾實屬深明大義著卽飭令馬德新等
妥爲辦理○僧格林沁奏捻匪擊退後在郟城一帶游奕十一月
二十七日由曹州過河向虞城縣一帶回巢亟須趕緊籌防戢饒

該逆再入東省當飭黃河隄岸各州縣修築長圍加高培厚務使一律堅固查鄆城等縣團勇節次與捻匪接仗頗稱勇敢若以團勇防守長圍輔以兵力可期聯絡無事之時派令出濠哨探一有警報全數在長圍防守以資抵禦惟人數既多所費甚鉅此項經費擬於本省按畝捐資此外辦理釐捐及官紳樂輸均作爲本省防堵經費已札飭運河道敬和等查照成案先自濟甯州試辦畝捐應請飭下撫臣文煜迅卽派委委員分投勸辦以期迅速肅事

上諭軍機大臣等山東爲北路藩籬果能憑河築壘以民團分段防守輔以兵力可期穩固著僧格林沁等卽按照所奏妥爲辦理並著文煜迅卽派委委員分投勸辦以期兵民互相保護經費有資俾捻氛不得再行闌入是爲至要將此由五百里各諭令知之○命告病雲貴總督張亮基畱辦雲南軍務俟新授總督劉源

灝到任再行交卸○己巳諭內閣惠親王等奏會議恭親王奕訢等奏辦理通商善後章程一摺據稱恭親王奕訢等籌議各條均係實在情形請照原議辦理等語京師設立總理各國通商事務衙門著卽派恭親王奕訢大學士桂良戶部左侍郎文祥管理並著禮部頒給欽命總理各國通商事務關防應設司員卽於內閣部院軍機處各司員章京內滿漢各挑取八員卽作爲定額毋庸再兼軍機處行走輪班辦事侍郎銜候補京堂崇厚著作爲辦理三口通商大臣駐紮天津管理牛莊天津登州三口通商事務會同各該將軍督撫府尹辦理並頒給辦理三口通商大臣關防毋庸加欽差字樣其廣州福州廈門甯波上海及內江三口潮州瓊州臺灣淡水各口通商事務著署理欽差大臣江蘇巡撫薛煥辦理新立口岸除牛莊一口仍歸山海關監督經管外其餘登萊各

口著各該督撫會同崇厚薛煥派員管理所有各國照會及一切通商事宜隨時奏報並將原照會一併呈覽一面咨行禮部轉咨總理各國通商事務衙門並著各該將軍督撫互相知照遇有交卸專案移交後任其吉林黑龍江中外邊界事件並著該將軍等據實奏報一面知照禮部轉咨總理衙門不准稍有隱飾 諭軍機大臣等恭親王奕訢等奏請由廣東上海各派識解外國言語文字二人來京差委及各海口內外商情各國新聞紙應由各該大臣暨各該將軍督撫府尹按月奏報並知照禮部轉咨總理衙門卽由該大臣飭知禮部由該部咨行可也並准於八旗中挑人學習外國言語文字知照俄羅斯館妥議章程認真督課如能熟習各國文字卽奏請獎勵至各口洋稅見有扣款議定按稅扣歸二成立有會單又有夷人幫同司理稅務每月徵收若干自宜徹

底徵清不至侵蝕中飽第將來扣款既清之後應如何妥議章程俾無日久弊生著恭親王奕訢等再行悉心妥議以免弊混其餘未盡事宜並著隨時詳議具奏○諭綿性奏變通私徵轉爲公用一摺據稱近日各城回戶除正賦外每年各該阿奇木伯克向回戶多收普爾錢每戶不下兩三串之數果能查明回戶將每年所納私賦之中減免一半其餘一半俾充經費回戶憔悴可蘇經費亦有裨益所有內地應解之款即可用資京餉並請由阿克蘇先行試辦俟有成效後再請飭回疆各城酌辦等語回疆各城伯克多徵回戶錢文本屬陋規例應裁禁綿性請以私作公明加暗減係爲經費起見惟私徵改爲公用後難保該伯克不私向各回戶再行額外加徵重累回人著常清景廉體察情形將綿性所奏有無流弊之處悉心妥議詳細覆奏原摺著鈔給閱看將此諭令知

之○命貴州提督田興恕爲欽差大臣督辦全省軍務○庚午以

廣鳳爲內閣學士

由詹事選

○辛未諭內閣聯捷奏剿辦土匪生擒首

逆直豫交界肅清一摺山東土匪李潰等突竄河南直隸境內經

聯捷督飭該地方文武鄉團兜剿生擒首逆李潰等十餘人悍匪

百餘名五日之內將此股土匪悉數殲除辦理尙屬迅速所有在

事出力文武官紳准其擇尤保奏無許冒濫○諭軍機大臣等都

與阿奏布置水陸防剿並鎮城兵食匱乏請旨飭催協餉一摺該

將軍親至邵伯履勘湖防並令李德麟駛赴下游會同陸路嚴防

逆匪竄渡布置尙爲周妥惟據稱鎮防兵勇缺餉日久十月初間

每名僅關銀一兩飢寒交迫愁怨思潰巴棟阿等以勢甚危急函

令於江北糧臺暫借銀四萬五千兩散放見已由江北糧臺籌借

米石趕運鎮防復令喬松年設法接濟等語鎮防兵勇銀米兩絕

軍心浮動竟有赴丹陽投賊之語情形實屬危迫都興阿雖已籌米趕運鎮防並商令喬松年於江北糧臺無論銀錢速行籌借解赴鎮營究恐杯水車薪不能濟急鎮江爲沿江緊要門戶儻因糧餉匱乏兵勇投賊關繫南北全局况鎮防兵餉本應由江南糧臺支放薛煥若不急籌接濟設有貽誤自問當得何罪見在江北糧臺來源日絀豈能兼顧鎮餉著薛煥卽將該營軍餉由上海迅速籌撥毋得推諉遷延致誤要需將此由六百里各諭令知之○署四川總督崇實奏滇匪竄擾永川見在兜剿情形得旨永川失守著迅速查明分別辦理○命浙江黃巖鎮總兵官黃彬幫辦荊州將軍都興阿軍務○予四川陣亡李英聚祭葬世職建祠縣丞胡興儀等祭葬世職○壬申諭內閣本日覽戶部本內河南司掌印係郎中晉翼朕知此人見尙年輕在部年分亦必不久何以遽派

要差如果其人尙堪造就不妨俾資歷練不可開躁進之門○以
續捐軍餉永廣東鄉試中額六名新會河源茂名化文昌學額
各五名東莞歸善龍川各四名翁源連平永安高要電白吳川瓊
山各三名香山英德合浦嘉應平遠各二名增城從化三水花曲
江博羅和平長甯大埔海陽陽江新興鶴山陽春信宜石城海康
遂溪徐聞澄邁會同樂會定安東安始興興甯長樂鎮平各一名
○癸酉諭軍機大臣等恭親王奕訢等奏遵議剿賊運漕各情一
摺江南官軍見尙未能進剿金陵卽令夷船駛往非特不能收夾
擊之效並恐與賊相持惟有告以中國兵力足敷剿辦將來如有
相資之日再當借助並籌款購其槍礮船隻其代運南漕一節由
薛煥出示招商運津無論華商夷商一體販運按照稅則完納稅
餉官爲收買按照時價公同估斷著曾國藩薛煥隨時酌量情形

安爲辦理○諭本日據恭親王等奏請飭東三省練兵並籌畫餉需等語據稱吉林黑龍江與俄夷相鄰邊防緊要近因軍營需用馬隊紛繁於吉林黑龍江屢次徵調實有空虛之患請飭該將軍等於東三省各營兵丁勤加訓練弓馬之外兼習技藝擡槍按期操演各路軍營以後不得再調該處馬隊等語吉林黑龍江應嚴密防範未可稍涉大意其應如何將各營兵丁勤加訓練俾弓馬之外兼習技藝擡槍之處著景瀄麟瑞特普欽那敷德等妥議章程具奏應需經費著先行設法捐辦復據文祥奏前任副都統富明阿前在江北軍營素稱得力見在受傷回旗養病請飭該將軍查奏等語著特普欽等查明富明阿見在是否病痊據實具奏○諭前據勝保奏訓練京兵章程一摺並將章程十條開單呈覽當經逐條批示茲據奕訢等奏請令八旗兵丁添習槍礮技藝一摺

據稱見擬有技藝各營兼習槍礮僅習弓馬者加習槍礮技藝並挑選各旗營閒散餘丁另立營伍專習技藝擡槍如果操演純熟卽挑補各營額缺等語恭親王等所陳訓練八旗兵丁意在添習火器技藝儻能認真操練精熟自可有備無患著勝保按照硃批各條及本日恭親王等所奏悉心妥議酌定章程詳細具奏奕訢等摺著鈔給閱看勝保原奏練兵摺單一併發還○諭毓科奏寇氛偏近潯防請暫緩九江通商一摺據稱微池巨寇分股竄陷東流建德上犯彭澤湖口勢甚猖獗經曾國藩調派道員彭玉麟總兵陳大富等督率水陸各軍分馳剿辦九江適當其衝如此時遽往籌辦開商不惟商賈屏迹無從交易尤恐逆氛肆擾有礙英國舟行宵小奸民乘機竊奪大江港汊紛歧地方官吏剿賊不遑查拏匪易轉致有傷和好請飭給發照覆可否暫行展緩辦理等語

英國在九江通商業經允准惟此時賊犯彭澤湖口恐於該國貿易有礙著恭親王奕訢等即將毓科所奏情形照會英國使臣與之婉商俟明春賊勢漸平九江一帶江面安靜再行辦理原摺著鈔給閱看○命河南按察使鄭元善幫辦團練大臣毛昶熙軍務○甲戌署湖南巡撫翟誥奏逆匪竄至道州經紳團堵剿賊未得逞卽分股由永明地界竄入大港山進犯江華縣屬之羅坪江華縣知縣王起銜等力戰堵禦適魏喻義自甯遠馳至江忠義亦由四眼橋疾進賊始卻退江忠義魏喻義令各營嚴整以待十月初一日賊眾麤至江忠義等分路迎擊賊以馬步各隊直撲前營營總陳希祥等以槍礮環擊斃賊甚眾餘匪屯踞左右村莊且於後路築壘以阻各營糧運劉嶽昭等知各營被圍揮軍直入江忠義等亦於是日出隊夾擊陣斬逆首姚宏茂及賊黨多名賊猶抵死

抗拒我軍爭先撲過賊卡將北嶺西嶺一帶賊營概行燒毀江忠義料其窮蹙將遁傳令各營潛師夜起左右鈔擊又伏田隴間鳴鼓發號賊自相驚擾各營乘之殺馬步賊匪數百名拔出難民無數窮追至次日辰刻始行收隊總計數日之內連次鏖戰賊之精銳爲我師殺斃者不下四千餘人其竄至臨武經署知縣翟允之等派兵練乘夜劫殺又於土地墟邀擊尾隊前股已竄往宜章署知縣盧肇煦卽會同參將胡國安等率勇迎敵斃賊千餘追至石子嶺賊大隊麋集黃滔熙一軍行抵良田聞警疾馳到宜魏喻義劉嶽昭等營亦陸續漸集於是各軍勇氣百倍分道而進諸賊悉眾狂奔先是賊至宜章卽分黨一竄桂東一竄桂陽其竄桂東一股經知縣楊先榮督帶團練在於樟溪堵截該逆仍由舊路回竄歸併大股直趨桂陽縣城知縣許金堂參將黃開甲等集團堵禦

黃涪熙亦到桂會合剿辦賊知不敵紛紛竄走許金堂等同城接
捕零匪黃涪熙整隊再追則賊已竄江西南安府界矣臣已飭江
忠義等分駐郴屬相機策應杜其回竄此次各營將士轉戰數百
里殺賊逾萬在事文武員弁官紳兵勇等均屬著有微勞可否容
臣擇尤保奏以示獎勵 上諭內閣粵匪闖入湖南眾號七八萬
竄擾道州江華永明桂陽藍山臨武桂東地方並繞襲宜章桂陽
縣城剽疾異常各將士轉戰數百里殺賊逾萬各州縣齊團設守
亦能勦力同心俾賊不得喘息竄出境外在事文武員弁官紳兵
勇人等均屬著有微勞著翟誥查明擇尤保奏○子安徽陣亡巡
檢黎源陣亡參將胡國安等祭葬世職○賞熱河駐防額魯特官
兵皮衣○乙亥恭親王奕訢等奏再陳見辦情形得旨見在總理
衙門既有軍機大臣兼領似亦可飭章京往返查覈要件各部司

員既請毋庸在本衙門當差禮兵兩部接發文件似亦可令該部兼行司員專司其事該部堂官亦當預聞若如所請軍機處兼行章京兩處行走應歸何處查覈勤惰並保舉參劾應如何辦理以上數層著再行覆奏○丙子諭內閣文謙奏省城團練分畱撤畱並請保出力各員一摺本年直隸省城團練經文謙督率訓練晝夜巡查不遺餘力並派往近京一帶勦捕土匪見在地方安謐自應分別撤畱其在事出力官紳卽著文謙擇尤酌保毋庸由恆福具奏○曾國藩奏查逆黨撲犯建德普承堯未戰而潰建德縣城失陷普承堯退至彭澤旋又退至湖口九江該逆分股竄擾彭澤湖口鄱昌及鄱陽浮梁景德鎮等處臣卽派副將唐義訓帶祁門各營馳剿建德與沈寶成等會合前進該軍等甫行十五里賊卽列隊河洲而以馬隊扼踞各卡我軍東西兩路緣山而上直前迎

擊復令一軍鈔賊後路賊始敗潰唐義訓仍分路前進殺城壘各賊齊出我軍整隊排列賊亦列隊抗拒相持一時之久忽有馬賊中礮落地我軍乘機渡河排牆而進朱聲隆沈寶成由南門追賊入城賊向東門竄出黃惠清馳至東門闌截其西北賊卡經唐義訓等循山上下拋放噴筒火彈賊壘立破敗匪踰濠遁竄人馬踐踏屍積山谷各軍追殺十餘里當將縣城收復查普承堯在防日久不能堅守縣城以致被陷貽誤江皖大局應請旨將九江鎮總兵普承堯卽行革職拏問以肅軍律所有此次出力之副將唐義訓等先行開列請旨獎勵其餘出力員弁可否容臣擇尤保獎出自恩施○上諭安徽池州逆匪竄陷建德縣城經副將唐義訓等督軍克復勦辦尙爲迅速副將唐義訓著交軍機處記名遇有總兵缺出請旨簡放州判朱聲隆著免選本班以同知畱於江蘇

補用副將沈寶成著賞給正二品封典黃惠清著賞給才勇巴圖魯名號參將陳玉恆著以副將留於兩湖補用遊擊葉光岳著以參將留於江蘇補用其餘出力員弁准其擇尤保奏候朕施恩九江鎮總兵普承堯帶勇馳防建德不能堅守待援節節退避貽誤江皖大局實堪痛恨著卽革職拏問以肅軍律○曾國藩奏查左宗棠一軍前往樂平旋因西路有警移紮景德鎮探報南贛另股由貴溪境內竄過安仁有直撲饒景之勢左宗棠派遊擊王開琳等各營相機迎剿賊竄貴溪地方十月二十一日官軍乘夜翻山而進兩路圍逼斃賊三四百人賊分大股來救喻勝榮等分路鈔出賊勢大敗乘勝追殺七八里斬馘四五百人該逆敗過小河突有丁家坊股匪隔河猛撲王開琳令各軍由丁家坊上下小港衝入賊遂向高山奔竄是日共斃賊二千餘名生擒數百名左宗棠

探知敗匪已由弋陽竄至德興地方卽飭王開化楊昌濬督帶各營進剿行至楓樹嶺賊擁攔來撲王開化等列隊山岡指揮策應該逆驚潰追殺數十餘里適老湘各營踵至卽與王開化等於十一月初一日合兵進攻直逼城下賊見我軍旗幟卽由南門奔走我軍一面收復德興縣城一面跟蹤追剿探知竄賊已陷婺源諸軍整隊前進分路環攻各門賊出二千餘人負城迎拒我軍兩路齊進賊潰入城閉門死拒諸將督勇奮力登陴賊奪東南門逃出我軍兩面鈔擊並派隊由上游截殺偏賊紛紛墮水餘匪由開化竄去卽於初三日克復婺源縣城查左宗棠一軍自移師景鎮駐紮未久一聞貴溪警報分路調撥或迎頭截擊或跟蹤追剿計十日之內轉戰三百餘里連克二城實屬調度神速懋著勤勞應如何優獎之處伏候 聖裁其餘出力員弁可否准 臣 擇尤保獎出

自聖主鴻慈上諭此次候補京堂左宗棠一軍由樂平移紮景德鎮派兵克復德興婺源兩城勦辦甚屬迅速候補四品京堂左宗棠以新立之軍驟當巨寇連克兩城著加恩以三品京堂候補仍著督率官軍迅掃逆氛○諭軍機大臣等前據文煜奏鄒縣地方教匪宋繼明等傳教聚眾設壇祭旗經知縣林士琦前往查拏膽敢開放槍礮列仗抵禦經兗州鎮總兵富新會同知府張鵬志帶領兵勇由土旺上馬莊一路進剿頗有斬馘及至官莊地方該匪死力抗拒未能得手茲據該撫奏稱守備姜長清奮勇殺賊中礮陣亡官軍由官莊退至土旺見在撥調德州等營官兵千名俟行抵近省地方卽由該撫親自帶往堵剿等語此股教匪聚眾戕官兇醜頓張亟應乘其初起趕緊撲滅勿令滋蔓難圖僧格林沁見駐濟甯距該縣境不遠著卽分撥官兵前往勦辦並著文煜

迅速出省親督官軍務將此股教匪剋日掃除毋畱餘孽不得坐待各營官兵調齊再行出省致誤事機姜長清陣亡情形著文煜查明具奏將此由五百里各諭令知之○丁丑諭內閣前因恭親王奕訢等奏請將長蘆鹽政一缺裁撤歸直隸總督兼管等語當交戶部議奏茲據奏稱長蘆鹽務改直隸總督統轄可期全綱整飭等語長蘆鹽政一缺著卽裁撤所有督運辦課事宜統歸直隸總督管理卽著恆福會同崇厚將正雜已收未收各款逐細盤查交代清楚其餘未盡事宜著該督詳細妥議具奏嗣後長蘆鹽務是其專責著卽督飭鹽運使認真經理於應支正雜各款及各衙門帑利官租等項銀兩實力催徵完解務期年清年款不得稍有帶欠其原設鹽政衙署及養廉銀兩並著改歸新設辦理三口通商大臣以資辦公天津關稅並著該大臣兼管分晰造報○己卯

雲南提督傅振邦以病免命山西太原鎮總兵官田在田督辦徐
宿勦匪事宜江南徐州鎮總兵官滕家勝淮徐道吳棠幫同辦理
○庚辰 上御萬樹園賜蒙古王等宴賞賚有差○僧格林沁西
凌阿國瑞奏據兗州鎮富新等先後稟報敎匪頭目宋繼明等聚
集五千人擾害各村經該地方文武督帶兵團前往查拏該匪
膽敢列仗抗拒戕害守備一員兵勇多名 臣西凌阿帶兵前往十
二月十二日分三路進勦逆匪約有七八千人自南山至北山竄
擁而至我兵槍礮齊施斃賊七八百名餘匪敗入老巢 臣僧格林
沁復令 臣國瑞督兵前往協勦行至龍泉地方卽見逆匪自南山
頂至北山坡橫列七八百我兵奮勇爭先 臣西凌阿亦率步隊由
北面轟擊兩路會勦將南山坡並河灘大股逆匪擊斃將及千名
其餘奔竄山頂官兵追至后峪瓦曲之間又斃賊百餘名旋即收

隊仍撤回土旺紮營已飭兗州鎮總兵富新兗州府知府張鵬志
鄒縣知縣林士琦等督帶兵團認真搜捕餘匪十三日據伊興額
稟報探聞擒匪五旗並出欲撲濟甯大營當將剿辦教匪之馬步
官兵全行撤回嚴加防範此次剿匪尤爲出力之各營官兵可否
由_臣等查明保奏之處出自 鴻施 上諭內閣山東鄒縣地方
教匪宋繼明等聚眾滋擾拒傷弁兵經僧格林沁派撥官兵進剿
斬斃甚多辦理尙屬迅速所有在事出力各營官兵著僧格林沁
查明保奏仍著督令該地方文武將餘匪按除淨盡毋畱餘孽○
僧格林沁奏查東省倚恃鄉團聚眾抗糧者不一而足推原其故
東省雖有督辦團練大臣並不周歷查看亦未認真辦理地方官
雖知村莊有聚眾情事既以團練爲名卽不敢過問若不及早挽
回必致釀成巨案更難收拾督辦大臣杜翻數月以來並未辦有

成效每至一處地方官備辦車馬供應與督撫同以致眾議沸騰
各處張貼匿名揭帖鄉黨爲之不平臣抵濟甯時該侍郎亦在濟
甯追賊氛較近該侍郎卽往曹州復至武定捻匪各處竄擾該侍
郎身任督辦並未率領鄉團防守扼截實屬有負委任相應請旨
撤去督辦大臣其團練事務責成山東巡撫督率地方各官認真
辦理務當選擇公正紳士鄉望素著之人專司其事不得藉端勒
索儻該團總等有惑眾抗糧勒索鄉民情事卽由地方官隨時稽
查從重懲辦儻各地方官不能秉公辦理稽查不力由該撫據實
嚴參庶幾可收實效 上諭前任戶部侍郎杜翻督辦山東團練
旣據僧格林沁奏稱該侍郎查閱各處供應未免浩繁况未著成
效著卽撤去督辦山東團練大臣俟交審案件訊辦完結後再行
來京所有山東省團練事宜卽著文煜督辦該撫務卽督率所屬

地方官認真經理選擇公正紳士專司其事嚴飭各處團總等同心守禦不得藉端勒索惑眾抗糧該地方官亦不得以見在撤去團練大臣輒卽遷延不辦如各該州縣不能秉公辦理實力稽查及浮收勒折以致百姓有所藉口別滋事端卽行據實嚴參毋稍徇隱○袁甲三奏四川川北道苗沛霖自咸豐七年收撫後屢次帶練助剿不爲無功但其人桀驁難馴往往倚勢妄爲臣與翁同書隨時面商仍欲設法籠絡使爲我用是以該道始欲奪占沿海關稅釐局臣等卽勉從所請另於下蔡添設一局專濟該練勇糧之用委曲求全不爲不至詎苗沛霖與同辦團練之已革副將徐立壯因私怨不洽焚其房屋搶其資財擄其人口毀其墳墓徐立壯僅以身免已屬駭人聽聞後又糾約各路練總赴下蔡議事因壽州城內紳董孫家泰等未到大拂該道之意函令壽州團練將

孫家泰細獻方保無事從此隙怨愈深十一月初一日苗練頭目
多人赴壽州城內不知欲爲何事被壽州練局殺害七人經翁同
書札委廬鳳道才宇和等查明究辦未據詳覆而苗練時有渡淮
攻城之說適徐立壯避難到壽遂與孫家泰集練駐防河口以禦
苗練臣與翁同書復飭才宇和趕緊查辦並派員前往開導尙未
定議而苗練黨與王金魁又於十一月十三日在潁上縣地方劫
掠餉銀官米並將礮船二十隻扣留備搭橋渡淮之用經臣飛函
飭諭該道捏稱患病誘爲不知令其公局覆臣稟函亦自謂所行
實有過當之處而飾詞奪理藉端要求竟不知法紀爲何物因徐
立壯前在撫臣營中孫家泰本住壽州城內遂欲藉口撫臣以爲
挾制其居心實不可問且先經壽州紳民接獲苗沛霖致其黨姚
有志信函有先清淮北次清淮南不患大事不成等語見在淮河

已爲梗阻遣黨四出臣若明斥其非恐橫逆更無底止如撥兵致討又恐兵連禍結猝不可解且粵逆擒匪均近在咫尺設乘閒句結愈覺難以收拾反覆思維不得不於無可包容之中再行遣人婉轉牢籠苟有一綫可原斷不操之過急但其心存叵測背叛已形能否敷衍目前尙未可知事在急迫應請速降諭旨斥其恃眾妄爲如有被害冤抑聽候官爲查辦勿許妄動庶幾仰藉天威潛移默化以期消患未萌上諭四川北道苗沛霖帶練立功忠勇奮發並能約束所部練勇講求軍律不許妄爲滋事是以朕疊加簡擢冀其與官軍協同滅賊爲國宣勞渥膺懋賞近聞壽州團勇殺害苗練因而彼此尋仇懷疑不釋苗沛霖係屬大員必不至因私忿而忘公義如其所部練勇因嫌起釁該道員亦應妥爲彈壓聽候地方查辦不得私相報復所有壽州團勇殺害苗練一

案著袁甲三會同翁同書秉公查訊如果練董孫家泰等有濫殺無辜情事據實具奏按律懲辦毋得稍有偏袒隱飾○諭軍機大臣等僧格林沁等奏捻逆出巢北竄見擬整隊截剿等語捻匪每遇冬春之交卽行離巢四出焚掠習以爲常該大臣見旣稱有賊目趙浩然等率領藍黑兩旗賊隊圍攻陳家寨後卽向北竄至碭山縣境地方又據伊興額報稱捻匪五旗並出有直撲濟甯大營之信見在西凌阿國瑞剿捕鄒縣教匪竣事業已將全隊撤回著該大臣等趕緊整飭隊伍聯絡鄉團扼要嚴防一面勤加偵報儻遇該匪竄至卽相機截擊毋令闖入東境上次羊山之戰官軍未能得手此次如捻逆北竄該大臣等務當布置周密妥謀定後戰不可稍涉大意將此由六百里諭令知之○諭本日袁甲三奏軍營餉無來源萬分支絀等語袁甲三軍營因淮河梗阻餉無來源以

致兵勇解體該大臣所奏情形實屬萬分危迫若不速籌接濟恐
有意外之虞著黃贊湯文煜無論何項務各迅撥銀四五萬兩並
著黃贊湯提餉票二十萬兩派委妥員兼程剋日解赴袁甲三軍
營以濟急需毋得遷延推諉將此由六百里各諭令知之○予山
東陣亡侍衛遐昌等祭葬世職○辛巳英桂丁父憂回旗身孝以
常績暫署山西巡撫

由布政使署

○壬午諭軍機大臣等景瀄麟瑞奏

請開荒濟用一摺據稱查得吉林地方涼水泉南界舒蘭迤北土
門子一帶禁荒約可墾地十萬晌省西圍場邊約可墾地八萬餘
晌阿勒楚喀迤東蜚克圖站約可墾地八萬餘晌雙城堡廢存圍
荒及恆產來界邊荒可墾地四萬餘晌均委員履勘地屬平坦別
無遲礙見有佃民王永祥等認領先交押租錢共二十餘萬串於
將來查辦邊界一切船糧車馱經費可資備辦請將前項各荒一

律招墾卽以押租借給查界之費餘則悉數解京俟領種五年後再將升課錢文接濟京餉等語吉林荒地既可援案招墾別無違礙於經費不無裨益卽著按照所奏辦理仍照舊章先取押租俟五年後升課惟事屬經始務須辦理妥協並隨時嚴查以多報少情弊其押租作爲查界經費外餘贖錢文及以後升課錢文毋庸解京卽著據實奏報抵充該省官兵俸餉以省往來運解之煩將此由五百里諭令知之○諭景淳奏豫陳俄國分界江道險阻勢難如約會齊一摺據稱此次成琦至烏蘇里江口會齊必須開江後方能行船約四月下旬可到如由江口上往興凱湖中國旣無火輪船駕駛又無陸地可通鍋帳等項無法駄運恐致臨時貽誤至黑龍江下流至烏蘇里河口界限分明易於勘辦惟興凱湖至圖們江必須該管熟悉地方情形之員會同履勘方期日後照辦

不至節外生枝應俟成琦行抵吉林或委該地方大員分投會齊或親詣興凱湖一帶勘辦容俟妥議具奏等語明年三月東界查勘在烏蘇里會齊據景瀄奏稱必須開江後方能行船約在四月下旬可到此節必須先期照會該國以免藉口興凱湖至圖們江爲分界要地尤應秉公勘定設立界牌以期永久相安著恭親王奕訢桂良文祥將景瀄所奏情形悉心籌畫並著成琦於明春前赴吉林與景瀄會商總期及早設法親至興凱湖圖們江一帶與俄國使臣查明交界地方方爲妥善原摺著鈔給閱看○諭瑞昌王有齡奏請調京口礮船來湖助剿等語太湖襟帶江浙爲兩省險要之區該處港汊紛歧水面遼闊見有礮艇不滿十隻湖州擊敗賊船三十餘隻欲犯西山胥口以內停泊賊船數百號欲糾約蘇郡賊眾水陸撲犯東山並有白蓬船十餘隻先行出口雖經總

兵王之敬督率礮船暫時擊退而胥口港內賊船甚眾時思窺伺
非增調礮船助剿防守難期嚴密著薛煥卽將京口礮船六隻迅
速撥赴太湖聽候王之敬調遣以固蘇浙門戶毋得稍涉遷延致
滋貽誤將此由六百里諭令知之○癸未諭軍機大臣等恭親王
奕訢等奏遵籌新設衙門未盡事宜酌擬章程十條開單呈覽並
覆奏章京司員等兼行走各一摺所有單開各條經朕詳加披覽
尙屬妥協惟內酌籌經費一條所稱心紅紙張等項銀兩擬於天
津上海酌提關稅起解部餉款內按各口提用數目均勻酌提銀
兩由各該將軍督撫府尹監督解總理衙門以資辦公等語此項
銀兩亟資辦公恐各口酌提一時未能應手著卽按照所定每月
支領銀兩數目徑由戶部開支將來各口解到酌提關稅銀兩統
交戶部毋庸解交總理衙門該衙門如有不敷之處奏明由戶部

支領至各省機密事件應照例奏而不咨如事關總理衙門者卽由軍機處隨時錄送知照亦甚便捷著毋庸由各口先行咨報總理衙門以歸畫一其軍機章京於滿漢各員內挑取各四員作爲總理衙門額外行走專管交涉事件及檢查機密文移責任綦重雖不必常川到衙門而該章京等在兩處行走恐日久有互相推諉之弊其應如何酌定章程以免曠誤之處著再行妥議將此由五百里諭令知之○諭文煜奏攻剿教匪續獲全勝一摺鄒縣教匪經僧格林沁派令西凌阿等帶兵攻剿殲除殆盡並將田黃鎮一帶賊巢焚毀匪首宋允九已被轟斃該撫前擬調兵出省親往督剿此時匪勢窮蹙餘黨不難殲除文煜著毋庸出省所有前擬奏調官兵卽著飭令停止以節糜費西凌阿等所部官兵前據僧格林沁奏因徐宿捻匪仍欲回撲濟甯已將該都統等兵調回大

營所有按捕餘匪事宜卽著令參將吳應龍管帶見有之泰安兗州營兵會同地方文武鄉團嚴密查拏務期盡絕根株不留餘孽首犯宋繼明下落仍著查明嚴緝務獲毋任漏網將此由五百里諭令知之○予山東陣亡知縣孔廣璽等祭葬世職何允安於死事地方建祠季錫魯等附祀○甲申諭軍機大臣等本日據聯捷奏履勘河岸並見擬官紳合辦防務一摺據稱黃河上下游民間私設渡口甚多見在曉諭紳士將民渡酌量歸併倣照官渡一體安設營寨派令委員會同紳士分段巡查附近村民認真防守並擬將河身分成段落添捐礮船以備賊船搶渡等語黃河天險爲南北扼要關鍵直隸河南沿河一帶見經聯捷履勘籌防並與該地方紳士捐造船隻梭巡堵禦辦理尙屬周妥惟閱該道所繪圖內山東濟南東昌最爲緊要捻匪出沒靡常沿河地方亦宜一律

籌防以杜北竄著文煜卽將官私渡口迅行委員查勘聯絡紳民修造寨棚船隻嚴密防堵毋得有名無實日久生懈致誤事機將此由五百里諭令知之○諭聯捷奏履勘河岸見擬官紳合辦繪圖呈覽一摺黃河上下游各岸渡口向設營寨兵數無多不特捍禦難資卽稽查亦難周密見據該道責成本地紳士將民渡酌量歸併仿照官渡安設營寨派令委員會同巡查並勸諭村民分段防守添製礮船小船往來梭巡所辦尙屬周妥惟轉瞬春融恐匪徒出巢竄撲沿河一帶在在均關緊要務須督飭地方官紳認真巡守嚴密稽查儻有匪徒潛蹤偷渡卽當合力兜截毋得稍存玩忽其茅津渡口以上係屬山西地面並著聯捷親往履勘有應設防之處卽著一體嚴防仍將詳細情形隨時具奏將此由五百里諭令知之○楊載福奏查僞忠王李秀成大股由蘇州上竄連陷

東流彭澤二縣勢極狹狹

臣

督水師由下游堵剿疊獲勝仗於十

一月初三日與彭玉麟會合總兵陳大富各督兵勇馳往東流距

縣里許該逆先竄入城彭玉麟帶同都司胡友勝參將彭楚漢等

分路環攻賊不能支紛潰出城我軍乘勢進剿斃賊不可數計當

將東流縣城克復

臣

卽於十二日馳抵彭澤該逆麇聚城內

臣

督

同萬化林彭楚漢等疾趨西門併力攻擊並派隊由北門殺入該

逆不能抵禦卽時潰遁又將彭澤縣城克復此次在事員弁兵勇

均屬著有微勞容

臣

擇尤奏請獎勵伏候恩施得旨出力人員著

擇尤酌保毋許冒濫○命前任內閣侍讀學士段晴川隨同幫辦

團練大臣聯捷行營防務○予四川陣亡知縣沈耀章祭葬世職

○乙酉予雲南被戕知州彭克儁祭葬世職○丙戌諭軍機大臣

等據前勝保恭親王奕訢等先後陳奏訓練京兵各一摺當經諭

令勝保悉心妥議章程詳細具奏本日據勝保覆奏各摺片勝保
久歷戎行所議各條不無可採惟京旗各營同時訓練不惟該大
臣一人不能兼顧且恐過涉張皇自應不動聲色次第舉行以冀
悉成勁旅本日已派勝保管理圓明園八旗包衣三旗鳥槍營事
務見在該營正議操練兵丁該大臣著仍依該營舊制酌量加操
若悉照該大臣所奏殊多窒礙先將該營認真訓練如著有成效
自可推行各營仿照辦理至軍營號令最宜嚴明但兵丁積習已
深一時未能盡除如有不遵號令者應隨時懲辦但不可操之太
急致失兵心吉林黑龍江馬槍馬箭最爲純熟見在乾清門侍衛
中亦頗有其人堪作教習毋庸另向該省調取八旗漢軍巡捕技
勇各營本有藤牌亦無須添製至炸礮一項已傳知肅順等查明
火器營存儲若干此項炸礮工本甚鉅亦未便時常演放致滋糜

費兩翼前鋒八旗護軍各營添演擡槍已諭知麟魁等辦理矣另片奏苗沛霖呈遞稟函等語前因袁甲三奏苗練與壽州團練尋仇懷疑莫釋業經降旨令該道妥爲彈壓並令袁甲三翁同書秉公查辦此次該道專人至該大臣軍營遞稟亦爲此事本日已寄諭袁甲三等密查徐立壯等是否勾通髮逆挾制翁同書設法辦理苗沛霖所稟亦未可盡信該道係該大臣招撫之人素所信服必能消其反側著卽函屬該道令其靜候袁甲三等秉公查辦不得令其所部練勇肆意妄行互相仇殺將此由五百里諭令知之○諭前因袁甲三奏苗沛霖與徐立壯等尋仇懷疑業經明降諭旨令袁甲三翁同書秉公查辦本日據勝保奏苗沛霖遣弁赴營申懇徐立壯孫家泰攻打苗寨挾制巡撫等語並將苗沛霖原稟信單一併呈覽苗沛霖所稟各情雖未可深信但旣據稱孫家泰

徐立壯拘囚巡撫不許官軍進城強奪其印明調官軍暗勾髮逆
與苗營打仗如果實有其事於皖北軍務大有關礙著袁甲三一
面嚴密訪查一面將此旨密交翁同書將徐立壯等有無勾通逆
匪挾制巡撫情事據實具奏至苗練與壽州練勇尋仇孰是孰非
務須秉公查辦兩得其平不可稍有偏袒儻含混辦理希圖了事
恐各該練勇愈形跋扈更難駕馭諒該大臣等接奉此旨必能斟酌
妥善也將此由六百里諭令知之○命官文爲大學士仍留湖
廣總督任以戶部尚書肅順協辦大學士○命周祖培爲大學士
調沈兆霖爲戶部尚書以朱鳳標爲兵部尚書由副都御史遷○命欽差
大臣勝保管理圓明園八旗事務○丁亥以浙江湖州府城解圍
賞在籍道員趙景賢按察使銜餘升敘有差○己丑 上御勤政
殿賜科爾沁親王等宴○予江蘇殉難內閣中書馬釗等祭葬世

職○是月賑直隸開州等三州縣災民口糧蠲緩直隸開州等五州縣湖北荊門等二十二州縣暨武昌蘄州二衛被水災區新舊額賦並沔陽等十州縣本年漕糧河南睢州等四十七州縣被水被旱被擾災區新舊漕糧江蘇川沙等三十九廳州縣並蘇州七衛被兵災區新舊額賦及雜稅銀緩徵山東樂安縣被蟲被水災區新舊竈課甘肅狄道等十六州縣被雹被旱被水災區新舊額賦蠲免貴州都勻等三十三府州縣暨清江下江兩廳錦屏縣丞所屬及古州左右八寨台拱等九衛被擾地方額賦○是歲朝鮮入貢○會計天下民穀數直隸等省通共大小男婦二萬六千九十二萬四千六百七十五名口存倉米穀五百二十三萬一千九百二十石四斗六升五合一勺